

ASO FARAILE, 03 IUNI 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

Ia, avea lenei taimi e faafeiloai atu ai i le paia ma le mamalu o le tatou Maota i le afio o lau Afioga i le Tamaitai Palemia faapea foi le Sui Palemia ma le Aiga Kapeneta, faapea foi lea Itu o le Malu i a outou Afioga i Minisita Lagolago, faapea foi lea Itu o le Malu i lau Afioga i le Sui Taitai, faapea foi sui usufono mamalu uma o le Maota.

Faamalo le soifua, faafetai foi le lagi e mama, faafetai i le agalelei o le Atua ua taitai manuia mai lo outou soifua e faaauau le tatou galuega mo lenei aso. O le mea lea, malo le onosai faafetai foi le lototetele, faafetai foi le faatoatoa, aemaise foi tatou feau ma tiute ma galuega sa i ai ananafi, aemaise foi o nisi o feau aua lava lo outou valaauina. O le mea lea faamalo faafetai i lenei taeao mo a tatou galuega.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):

1. P.P.2022/2023 Nu.19, Lipoti a le Komiti o Tupe Maua ma Tupe Totogi i le P.P.2020/2021 Nu.97 & P.P.2021/2022 Nu.62, Lipoti Faaletausaga a le Faalapotopotoga o Inisiua Tau Soifua a Samoa mo Tausaga Faaletupe 2019/2020 & 2020/2021.
2. P.P.2022/2023 Nu.20, Lipoti a le Komiti o Tupe Maua ma Tupe Totogi i le P.P.2020/2021 Nu.107 & P.P.2021/2022 Nu.43, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo Tausaga Faaletupe 2019/2020 & 2020/2021.
3. P.P.2022/2023 Nu.21, Lipoti a le Komiti o Tupe Maua ma Tupe Totogi i le P.P.2020/2021 Nu.137, Lipoti Faaletausaga a le Matagaluega o Tupe mo le Tausaga Faaletupe 2019/2020.

4. P.P.2022/2023 Nu.22, Lipoti a le Komiti o Tupe Maua ma Tupe Totogi i le P.P.2020/2021 Nu.100 & P.P.2021/2022 Nu.22, Lipoti Faaletausaga a le Pulega o Tupe Faava o Malo a Samoa mo Tausaga Faaletupe 2019/2020 & 2020/2021.
5. P.P.2022/2023 Nu.23, Lipoti a le Komiti o Tupe Maua ma Tupe Totogi i le P.P.2020/2021 Nu.104 & P.P.2021/2022 Nu.37, Lipoti Faaletausaga a le Faletupe o Atiina Ae o Samoa mo Tausaga Faaletupe 2019/2020 & 2020/2021.

Ma le faaaloalo lau Afioga.

ILOILOGA O LIPOTI A KOMITI FAA-PALEMENE

P.P.2022/2023 NU.1, LIPOTI A LE KOMITI SUESUE FAAPITOA A LE PALEMENE I LE P.P.2021/2022 NU.36, LIPOTI O LE TAUNUUGA O LE SUESUEGA E FAATATAU I LE MATAUPU NA LAGA E LE LOIA SILI E UIGA I TEUTEUGA O LE FAAVAE 2020 & TULAFONO O FANUA MA SUAFA 2020 – felafolafoaiga faaauau – Aso Fono Iona 3

FOFOGA FETALAI: E tolopo felafolafoaiga i le aso ananafi ua maea ona saunoa le sui usufono mo Vaimauga 3.

Ae ou te le i tuuina atu le avanoa mo se isi sui usufono e saunoa, na ona toe faamanatu lava a le Nofoa i taimi faatapulaaina ua na o le 15 minute. Ma o totonu o lena 15 minute, e lava ma totoe e faaali ai foi lou finagalo, agai sao i le tatou Lipoti o lo o i luma nei o le Palemene.

Ma ia manatua foi e le sui usufono mamalu, o tatou faauilavea e i totonu uma lava o lau 15 minute. O le ala lena, e lelei lava le faamanatu atu pea ina ia outou silafia ma fua foi i ai le tatou galuega e faatino. O le mea lea, o le faasilasilaga lea a le Nofoa, ma le agaga faaaloalo.

Ia, o le avanoa lenei mo se tasi o sui usufono e fia saunoa. Ia o lea ua matau atu o lea ua tulai mai le sui usufono mo Lefaga ma Faleaseela.

Afioga MASINALUPE MAKESI MASINALUPE (Lefaga ma Faleaseela): E momoli atu le faafetai tele i lau Afioga i le Fofoga Fetalai mo le avanoa o lenei usugafono e tusa ai ma lenei mataupu a o taatia i le Laulau-a-Fono. Ou te muai faatalofa i le paia faatafafa o le Maota, i le afio o lau Afioga i le Fofoga Fetalai, afio foi lau Afioga i le Taitai o le Maota, lau Afioga i le Tamaitai Palemia, afifio foi alii ma tamaitai o le Kapeneta. E faatalofa atu foi i le afifio o Minisita Lagolago.

Liliu i le la Itu o le Malu, e faatalofa atu i lau susuga i le Sui Taitai, faapea sui usufono o le Palemene. E faatalofa atu foi i le Failautusi ma le mamalu

o le Ofisa o le Fono. E faatalofa i le susuga i le Loia Sili ma lona soatau, aemaise o Ofisa Sili o Pulega o Matagaluega ua mafai ona tatou molimauina lenei aso.

E le faagaloina foi le faatalofa atu i le tapuaiga a Le Ao o le Malo ma lau Masiofo, faapea le Sui o le Fono a Sui Tofia ma lou faletua. E faatalofa atu foi i le Faamasino Sili ma le Ofisa o Faamasinoga, ae le mafai ona galo le afaigaluega tofifi a le Atua i so o se tafa o lo o faapea ona galulue ai, aemaise o totonu o si o tatou atunuu.

Ia, lou itumalo e Lefaga ma Faleaseela, aemaise o nisi o tapuai mai atunuu i fafo, ia tapuai maia se i fai so tatou sao. Pau o lea e momoli le faafetai tele i le tatou itumalo ona o le teuteuina o le tatou itumalo, ia, tasi lea faailoga e iloa ai le tou agaga i le faamanatuina o le 60 tausaga. Ia, e oo foi i le tatou \$1,000 lea na aumai mai le \$51,000, ia lea ua uma lava ona faasoia atu ia tatou. Ia, e ui lava ina... ae o lena lava sa ifo tonu lava le fuiniu i le lapalapa.

Ae mo le faasaoina o lou taimi, ia o lea o le a ou oo loa i le tulaga pei ona i ai le mataupu ua taatia i lumamea. O le tulaga tonu lava e i ai lenei aso i le faagasologa o le mataupu e pei ona taatia nei i lumamea, o le Fono Faavae atoa ai foi ma le Faamasinoga o Fanua ma Suafa, e fia oo i ai se faamatalaga.

E muamua ona momoli lau faafetai tele i le Komiti i lau Afioga i le Taitaifono, le Sui Taitaifono, aemaise o sui usufono na filia mai le fuifui e avea ma e e iloiloina lenei mataupu. E i ai le talitonuga, ua matua malie atoatoa le faalogo a lou lava sui usufono e tusa ai ma le Lipoti ua outou tapena faa-fafine toaga. E leai lava se mea e tasi e le i oo i ai le sailiiliga. Ae i ai foi le talitonuga o tatou Komiti nei, o Komiti lava na fili mai i luga o le tulaga e faatino le galuega ma le faamaoni ma le amiotonu. Ou te manatua ai i lou lava sui usufono ina ua avea ma Komiti, ou te aumaia lava le Tusi lea a Ioane Mataupu 3 fuaiupu e 9 ua faapea mai, “O i latou uma o e ua fanau mai le Atua, latou te le faia le agasala, aua o lo o tumau i totonu ia te i latou lona uiga. E le mafai foi ona agasala, aua ua fanau mai latou i le Atua. O le mea lea e iloa ai le fanau a le Atua ma le fanau a le tiapolo. O i latou uma o e le fai le amiotonu, e le mai le Atua i latou, atoa ma e le alolofa i o latou uso.” E pei o le agaga lea o le Komiti ina ia faatino ai latou galuega. Ou te talitonu foi o le faatinoga atoatoa lea ua malamalama lelei ina ua faitau i ai i le Tusi lea, na suesue uma ai ma iloilo uma ai e sa molimau. E i ai foi lou talitonuga o Komiti nei o Komiti Faapitoa. O ai lava nisi e manaomia e aumai e molimau, e i ai lava le malosiaga o le Komiti e aumai ai.

Ia, faamalo faafetai i le galuega, ae se i ou oo atu i le tulaga lea o le faatamala ma lape. O le upu lava lea e pei e foliga e tautata i ai le tagata pe afai ua i ai se mea ua sese, faatamala, o lape. Ae ou te talitonu o ituaiga faamatalaga ia e le maua ai se nofo lelei, aua foi a pipio lava ma sisipa le faatinoga o mea uma e le taunuu lava i se taunuu lelei ma sona faaiuga. Ona faatusa loa lea i se fale foi lea e le lelei le faiga o le faavae, e amata mai lava i le faavae le fausiaina o le tino o le fale, e le fetai lava, ae maua lava

la i luga i apa. E oo loa i luga i le taimi e ato ai, e matua le talafeagai lava alavai. Ia ua sao ai loa le upu e fai i le matuaofaiva ma le falefa o le latou aiga salemalama, “e ta matasila lava le agaiotupu, ae popoe ai ma atugalua le faufalemau ina ne i salautouto le faleta, ona le tau lea o lau o le faamoemoe.

O le Fuaiupu 40(4) o lea ua molimauina e le Ofisa e ala i le sailiga a le Komiti, o le upu lava lea o lea sa aumai e faapea le Peresetene, “aveese loa, ia aveese loa le vaega lea.” Ae ou te talitonu, o le vaega tonu lea e taua i le Tulafono e limataitaiina ma faatonutonufolau ai le amiotonu a le Tulafono ina ia laugatasia uma tagata uma e sulufai atu i a latou mataupu. O lea foi e taua, afai o le 60 na pasia e le Komiti, o le mea lena e tataua ona i ai. O le 60 ma le 21, o lea e pei e foliga e faaluafesasi ai le Komiti, aemaise o le popolega o lou sui usufono, o lea ua maea ona pasia atu i totonu o le Palemene. A toe foi lava i luga i le faatamala ma le lape, o le fesili; o le a se tulaga lelei e tulai mai i le faatamala? E maua ai se ai? ae faapefea le agai i luma o tupulaga lalovaoa, aemaise o e o lo o taumafai e agai mai i le Maota leni? Afai lava o le faiga lea o le a i ai le faatamala ma sese ae faaalu ai lava faapea, e talafeagai? E oo foi i tulaga o lape, e pei e taugofie lava le upu, a o le faatinoga, o le matua le taitai ona talafeagai, e matua le amiotonu pe afai o le a alu ai lava i le tulaga e le o sagatonu le faatinoga.

O nei Tulafono pe a tomanatu i ai, e i ai lava le upu foi lele e pei o le upu lea e masani ona taua e Palauli, e leai lava se tautai na te toe sosofa le faalao o le taiao, ioe. O ai le poto? O ai le atamai e mafai ona ia toe sosofaina le faaiuga ua uma ona faatino e le Palemene? Na o mea faaletonu e i ai. O le amiotonu. Ou te taua e au o le poto lea ua taumafai e aumai, e sili atu i lo le atamamai o sui usufono. O iinei e maape ai mea uma, maape i luga o le tulaga o lea ua veloaso i ai le atunuu, sui usufono mamalu mai itumalo. Talofa, talofa, afai tatou te o faasipasipa ai faapea, e le taitai ona manuia, leaga e molimau le Faataoto e 6 i lona fuaiupu e 16, “o mea nei e ono ua inosia e le Alii, o lona fitu foi, ua matua inosia lava e ia. O mata faasiasia, o le laulaufaiva pepelo, o lima ua sasaa le toto o le ua le sala, o le loto ua manatunatu i togafiti leaga, o vae ua televavave ona taufetuli i le leaga, o le molimau pepelo ma le tautala i mea pepelo ma le na te faatupu maseiga i uso”. O le ala lea e vevesi ai, faatupu maseiga i uso.

Ia, o le fautuaga lena i le Afioga Paia a le Atua, aua e faamuamua le Afioga Paia a le Atua lua ai le Tulafono Tumau, ae ao la ina fai ma aua le taumafai foi lea e sau ma le Tusi Paia foi lele e faalala i i, leai, ia matua faitau lelei ma manino i ai.

Afioga Sulamanaia Fetaiai Tauiiili Tuivasa (Vaimauga 1): Lau Afioga i le Fofoga Fetalai, o sina mea e fia... i le Vaega 82 o le...

FOFOGA FETALAI: Ia se i fai mai sina au malologa.

Afioga MASINALUPE MAKESI MASINALUPE: O le mea lena e tatau ona i ai, e le o le sau ma le Tusi Paia, e tau lau mai verse...

FOFOGA FETALAI: Se i tulai mai le sui usufono mamalu lea po o le a sana fesoasoani i le lauga.

Afioga Sulamanaia Fetaiai Tauiliili Tuivasa: Ou te le i faalavelave lava i le lauga matagofie a le sui usufono lea, ae pei ua sai mai foi ma fai mai e leai se isi e faalala i ai le... Fai mai e uma loa le Tulafono Tumau, Tusi Paia loa. O lea e misi le tatou Tulafono Faavae lea sa aumai e Olo, Tusi Paia, Tulafono Faavae, faatoa oo loa i le Tulafono Tumau. O le mea lena e fesoasoani atu ai, faamama le sausau.

E momoli lava le agaga faafetai, o lea ua e toe talanoa e fai le amiotonu. O le mau lena a le lauga a le Vaimauga ananafi, ia tutumu i tatou i fua o le amiotonu ona alofagia mai ai lea e le Atua. Ia pei o le agaga lena e fesoasoani atu, Ia leaga o lea e misi le mea autu a le Palemene lenei, o le tatou Faavae. Ia pei o le agaga lena e fesoasoani atu ai i le...

FOFOGA FETALAI: Ia, o lea ua maua le finagalo o le sui usufono mamalu, aua e le i taua lava lou suafa a o lea ua e tulai mai. Ia, ai ona o oe sa e uua le Tusi Paia ananafi, ae malie ia... O le fautuaga lava a le tatou Maota, ae faaauau le saunoaga a le sui usufono mamalu.

Afioga Lupematasila Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

FOFOGA FETALAI: Ia, se i onosai mai lava mo le faasaoina o lou taimi se i tuu atu le avanoa i le sui usufono mo Falelatai ma Samatau.

Afioga Lupematasila Galumalemana Tologata Togia Tile Leia: Faafetai i lau Afioga i le Fofoga Fetalai mo le avanoa, ae mo le faasaoina o le taimi o lou uso a sui usufono, o lea e momoli atu le faafetai. O lea e matau atu e aoga tele lau faamanatu o le Tusi Paia i lenei taeao, ma o se faamanatu o lea e te faamanatu ai i le tou Vaega ma le Malo. Ae faafetai.

FOFOGA FETALAI: Ia faaauau le saunoaga.

Afioga MASINALUPE MAKESI MASINALUPE: Malo faafetai i lau Afioga. Ou te le tali atu leaga i te i ua afaina ai lou taimi...

FOFOGA FETALAI: Faaauau lau saunoaga i mea na e te lagona e taua.

Afioga MASINALUPE MAKESI MASINALUPE: Ae afai lava o lena e te lavea ai, ia o le pelu lava lena. Aua o le pelu lava o le amiotonu e alu i luma lavea sau i tua lavea. Ae faamalulu atu i le sui usufono mai Vaimauga 1, ia leaga o oe e leai sou tofi Aoa, a o le Tusi lea pei ona e taua, o le Standing Orders, o lea ua i ai uma i totonu ma le Faavae... O lea foi e i ai i totonu, a o lea ou te fai atu...

Afioga Sulamanaia Fetaiai Tauiili Tuivasa: Lau Afioga i le Fofoga Fetalai, o sina mea e fesoasoani atu i le tulaga ne i te i ua avese o lea e i ai faamaumauga, e uma loa le Tusi Paia, o le Faavae lea o le Malo Tutoatasi, alu atu loa lea ma le Tulafono Tumau lea lona tolu. Ae faasao lau saunoaga, o le Ekalesia lenei Katoliko, e le taua matou o Aoa, o le mea o le Taiala Sinia, e i ai la le sui usufono lea. O le auauna faauuna a le Atua.

Ia pei o le agaga lena e avatu i lau Afioga ne i te i ua e faalala mai lau Aoa, a o le Taiala Sinia lenei a le Katoliko, lele ua tagi Maria, ua sau le loifofoga... o la e malamalama ai le Taiala Sinia la lenei a lenei Ekalesia. Ma lou faaloalo lau Afioga i le Fofoga Fetalai.

FOFOGA FETALAI: Malo faafetai. Ia...

Afioga Sulamanaia Fetaiai Tauiili Tuivasa: Ae o le agaga lena, o lea e te misi le Faavae o le Malo Tutoatasi. O lea na ona sau lava o le Tusi Paia e oso loa i le mea lea. E taua le mea lea e misi ia te oe. Na ona fesoasoani atu i le sui usufono.

FOFOGA FETALAI: Ia, malo faafetai. Faafetai i le Taiala Sinia o le Katoliko, o lea foi ua fesoasoani mai atonu e lagolago atu foi i lau Susuga i le Aoa.

Afioga MASINALUPE MAKESI MASINALUPE: Faafetai i lau Afioga i le Taiala Sinia. O le Faavae lena o Samoa vaeatu lau Afioga i le Fofoga Fetalai, a o le Faavae lea o le Palemene, e tatou te savavali ai i le tulaga pei ona i ai. Ou te iloa ana o oe o se Tiakono Sinia e pei ona e taua, e te le ee i totonu o le Maota lenei, semeamanu e te fifilemu ma tausi lou filemu.

Afioga Sulamanaia Fetaiai Tauiili Tuivasa: Lau Afioga i le Fofoga Fetalai, na o sina vala lava lea e fia faasao, o lea e fai mai o le Faavae o le Palemene. O ai le Palemene? O le Palemene a ai? O le Palemene a Niu Sila? O le Palemene a Samoa, lea. Le Faavae lea o Samoa... O sina mea leaga o lea e pei e le o lilifa le finagalo o le sui usufono i le mea taua lea, o le Faavae lea, tusa o le tatou Tusi Paia lea i totonu o le Palemene ma tatou... a o lea fai mai na o le Palemene? O le Palalemene a ai lenei? O le Palemene a le

FAST. Ia, o le agaga lena, o le Palemene a Samoa. Ma lou faaaloalo lau Afioga i le Fofoga Fetalai.

FOFOGA FETALAI: Ia, faafetai. O lea e...

Susuga Hon Laauli Leuatea Polataivao Fosi (Minista mo Faatoaga ma Faiga Faiva): Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: Faafetai. Leai e leai se agaga e fia faalavelave i le paga lea e alu i lenei taeao, leaga e le o se paga na faafuaveta o le paga ua leva ona folifoli. Ae malilie sui usufono, tuu lua mea se i fai i le tatou ti i fafo, ae faasolo le tatou galuega o lea e alu le tatou taimi.

FOFOGA FETALAI: Ioe, o le mea foi lena e fesoasoani atu i le sui usufono o lo o saunoa. Ia o mea lava e faapena lava le va a o lo o tau tuli le tatou taimi e 15 minute. Faaauau lau saunoaga aua ne i e toe oo i le Taiala lea ua saunoa i ai le sui usufono mamalu.

Afioga MASINALUPE MAKESI MASINALUPE: Lau Afioga i le Fofoga Fetalai, faafetai tele lava, faafetai foi mo le... Ia, tuu ia ta mea e fai i tua ae se i faauma atu le lauga a Lefaga ma Faleaseela. E pei o le agaga tonu lava lena o lea e tau avatu ai se taofi ina ia tatou aputiputi, aputiputi le mamalu, le mamalu o le Palemene. O lau vaai ua faasolo ina solo le falute. Aisea? Ua le ogatasi le futia ma le umele.

I le tulaga e pei ona i ai ia te au lava ia i le matou Vaega, ou te talitonu lava au ia i le matou Taitai aua e faamaoni, e amiotonu. O le fautuaga foi lea ina ia savavali i le amiotonu, fai le amiotonu a le Atua. Ia pau lea.

Ou te manatu foi lau Afioga...

FOFOGA FETALAI: Ia, faamaea mai le saunoaga ua maea foi lou taimi lau Afioga i le sui usufono mamalu.

Afioga MASINALUPE MAKESI MASINALUPE: Ua ou vaai atu lava o lea ua amata ona e sauni e... Ia, le paia e o le Maota, afai ua paopapa se faamatalaga a Lefaga ma Faleaseela, ia tuu i tua o le manu e alu e pe i le vao. Si ou itumalo e, o le sao lena o le tatou itumalo, ia toaaga e teuteu faalelei le tatou... E iloa lava i fafo le lelei o le loto. A lelei le teuteuga, e fialia foi tagata e o atu i ai.

Ia manuia tele lau Afioga i le Fofoga Fetalai, manuia lau Afioga i le Tamaitai Palemia faapea foi Minisita Lagolago, a o le Lipoti lenei, e 200% lau lagolago i le Lipoti a le Komiti lenei, Taitaifono, Sui Taitaifono ma le Komiti, aua tou te vaivai e faatino outou tiute, o ifo e saina uma faapasiasia le mea ua leva ua alu aso o outou galulue ai. Ia manuia le Fono.

FOFOGA FETALAI: Malo faafetai malo foi faasoa i lau Afioga i le sui usufono mamalu mai Lefaga ma Faleaseela. Ia faafetai mo lou sao i le tatou Lipoti. E matau atu o lea ua tulai mai le sui usufono mamalu mo Faleata Nu.4 le Matua ia Ale. Ia, o lou avanoa lenei.

Tofa ALE VENA ALE (Faleata 4): Faafetai i lau Afioga i le Fofoga Fetalai ua maua se avanoa o lenei usufono e folasia ai se fautuaga e tusa ai o le Lipoti a le Komiti ua i lumamea nei o le Palemene i lenei taeao. Ma ua tatou i ai faatasi ma lau Afioga i luma o le Atua i lenei taeao i le faaneeneina o Lona Suafa Paia. Na tatou tatalo i le Atua ina ia alofagia le Palemene o Samoa ma ona upufai o Malo. Malo faafetai i lau Afioga, malo foi le faatoatoa, faafetai foi i le faatautaiga o le tatou fonotaga e le faigofie lau galuega aemaise foi o le maemae o sui usufono o lenei Paeaiga Lona XVII i le tele o taualumaga o le tatou fonotaga.

Ia, o le a ou taumafai lava e mulimulitaia lau faatonuga ina ia agai pea i le tatou mataupu. E faatalofa atu foi i lau Afioga i le Tamaitai Palemia ma ou tafai, Afioga i Alii ma Tamaitai Minisita o le Kapeneta, e faapea foi lena Itu i Afioga i Minisita Lagolago.

Le paia i le tapuaiga a Ofisa Sili o Pulega o Matagaluega. Paia faale-Malo, paia faale-atunuu, paia faale-talalelei aua le tapuaiga a Samoa, ia malo faafetai ua tatou maua lenei taeao fou i le agalelei o le tatou Matai Sili i le lagi.

Lau Afioga i le Fofoga Fetalai, faafetai. E ofo alofa atu foi i le matou Vaega nei i le Afioga i le Sui Taitai, ia faapea foi sui usufono mamalu uma o le Palemene.

Lau Afioga i le Fofoga Fetalai, o le Tulafono lenei, tasi lenei Tulafono sa matua laualuga ai feteenaiga o finagalo o le atunuu, e oo lava foi i alii ma tamaitai loia na matua feteenai lava o latou finagalo i le Tulafono lenei. O lea foi ua saunoa manino le Afioga i le Tamaitai Palemia i le Maota lenei ma le faafogafoga a Samoa, o le Tulafono lea o lea na savali ese ai. Ma e tasi lenei Tulafono o lo o i ai i le anavatau a le Vaega Faaupufai a le Faatuatua i le Atua Samoa ua Tasi, afai e tulai mai e pulea le Malo, e tataua ona aveese le Tulafono lea.

Lau Afioga i le Fofoga Fetalai, ua i lumamea o le Palemene le Lipoti a le Komiti, ma e faafetai atu i lau Afioga i le Taitaifono ma le Komiti sa iloiloina lenei mataupu. Ua ou faitau foi i le Lipoti atoa lava, i molimau ma mau tuufogofoga sa i luma o le Komiti, ma e moni le sailiiliga a le Komiti i le tele

o tulaga na aliali mai i le fesuiaiga ma le eseese o kopi. E ese le kopi na pasia e le Palemene, ese le kopi na tuuina atu e saina ai le aao o Le Ao Mamalu o le Malo, e ese foi le kopi na i luga o le upegatafailagi a le Ofisa o le Fono. O lea foi ua i lumamea le Lipoti lava ia a le Ofisa o le Fono, o le faatamala o le Ofisa o le Fono na tupu ai le mea lea.

E leai la se sese o le Palemene i le mataupu lenei, e matua leai lava e matua leai, leai leai lava se mea e tasi. O lape mai totonu o auaunaga a le Matagaluega. Ma e tasi lea itu e tataua ona silasila i ai, e le gata i le Minisita a o Ofisa Sili o Pulega o Matagaluega taitasi a lo tatou Malo, ina ia aua ne i lapelapea ni mataupu e faaiugafonoina e le Palemene lenei, leaga o iinei e fai atu ai a tatou Tulafono e leai se isi e mafai ona suia. E fau atu iinei e toe sui foi iinei.

Lau Afioga i le Fofoga Fetalai, o le a ou agai sao loa i fautuaga. O le fautuaga lea ua aumai e le Komiti, ina ia faasolomuli le Tulafono. A faalauteleina, o lona uiga e faaleaogaina. E mafai e le Palemene lenei ona faaleaogaina i se lafo, e faatu i se simple majority e fai ai le mea lea? e talia ai le fautuaga lea? E matua le mafai, le mafai, le mafai e matua le mafai lava. E leaga o lea e aafia le Faavae. Ae a oo foi ina teuteu le Faavae, e see atu i le Komiti e iloilo ina se mataupu e aumai i le Kapeneta, e 90 aso, ona faatoa lipoti mai lea po o a suiga o le Faavae e manaomia, ona vaai lea i ai o le Maota Fono lenei ma sui usufono mamalu o le Palemene.

O lau fautuaga la, le sui usufono lenei o Faleata 4 e tuutuu atu i lau afioga i le Palemia ma le Kapeneta, afai e finagalo ina ia atagia manino mai tulaga o mea tonu lava sa pasia e le Palemene i le Tulafono lenei, taoto atu i le Kapeneta e toe aumai se teuteuga. Afai foi e le o lona ae ua outou mananao loa e faaleaogaina le Tulafono lea, toe aumai i le Kapeneta se teuteuga, ina ia soloia ai le Tulafono lea, ma ia palotaina e le Maota lenei ia maua le 2/3 e faaleaogaina ai le Tulafono lea e tusa ai ma le anavatau.

O le mea la lea i lenei taeao i le tapuaiga a Samoa ma le faafogafoga tapuai mai a lo tatou atunuu, o le sao lona o lenei itumalo. Lau Afioga i le Tamaitai Palemia, o alofa molipo na mo lau Faigamalo, aua ne i o tatou fai Tulafono ae toe soli le Tulafono, e afaina ai o tatou tofi sui usufono. E le mafai ona fai le mea lea e fai mai ai le Komiti lea ma le fautuaga lea ua aumai e faasolomuli le Tulafono pe dispose, a tau le dispose o le ave e tiai i le lapisi.

Ia, lau Afioga i le Fofoga Fetalai, o lea ou te vaai atu foi ua uma lou taimi, ae momoli atu moomooga alofa i le tapuaiga a si ou itumalo o Faleata 4, ia malo lava tapuai. Faafetai foi i le tatou faamanatuina o le 60 tausaga o le tatou Tutoatasi. Malo lava faafetai. Aua le popole i le tatou Komiti, e ui lava ina feteenai lo tatou itumalo i le Komiti, o lea ua fai mai le Minisita o lea o le a resitala le tatou Komiti e maua mai ai faamanuiaga ma tatou galulue faatasi ma le Malo. Ia manuia tele le taeao o le Fonousu a Samoa, manuia le tapuaiga a le atunuu, soifua manuia lenei taeao, faafetai.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa o lenei itumalo.

FOFOGA FETALAI: Ua maea lou taimi lau Afioga i le sui usufono mamalu.

Afioga Sulamanaia Fetaiai Tauilili Tuivasa: O le Vaega 82 o le faauilavea lau Afioga i le lauga lea na uma nei.

FOFOGA FETALAI: Ia leaga o lea ua maea ua faauma mai le saunoaga a le sui usufono mamalu. E le mafai foi ona toe tali mai o lea ua faaii mai le saunoaga. Ae finagalo malie ia le sui usufono o lea ua faagasolo le tatou galuega ua oo i le avanoa o Aleipata Itupa i Luga.

Tofa ALE VENA ALE: Lau Afioga i le Fofoga Fetalai, ou te tatalo atu, se i fai mai, o le a le mea lea e manao ai le sui usufono lea o Vaimauga? E ui lava ona ua uma lau lauga ae se i... pe a tusa ai ma lou finagalo. Ae afai o lau faatonuga lea...

FOFOGA FETALAI: O le a tuu atu lava, aua o la ua toe faataga mai e Ale...

Tofa ALE VENA ALE: Ia fai o le a le mea lea e te manao ai?

Afioga Sulamanaia Fetaiai Tauilili Tuivasa: E masalo o Vaimauga ma Faleata e fealofani, ae o lau fesili i le sui usufono lea o Faleata, na e taua o le anavatau lea a le la Vaega lea na faamavae ai le Palemia ina ia omai loa faasolomuli. O lona uiga o lea e faataunuu lava le anavatau lea na valoia a taunuu mai i totonu ua toe faasolomuli le Tulafono lea? Aua o lea na e saunoa lava, o le vaega lenei o le Tulafono na faalauiloa e le la Itu, o lea ua uma le isi vaega o le lafoga a faifeau. A o lea la na e taua nei i le taeao o le isi lea anavatau a tulai mai... o lona uiga o lea ua aumai lava i totonu o le Maota lenei le anavatau lea na mananao e faasolomuli le Tulafono? E pei o le faauilavea lena, leaga o lea sa taua i le saunoaga a le Afioga...

Tofa ALE VENA ALE: Lau Afioga i le Fofoga Fetalai, se faapea lava au po o le a le mea lea... Ia a e toe fesili foi o la ua uma ona saunoa le Tamaitai Palemia, o le Tulafono lea na ala ai ona savali ese? O le Tulafono foi lea a tulai mai le latou faigamalo... o le tali lena. Manuia le tatou Fono.

FOFOGA FETALAI: Ia, atonu ua faamalieina le finagalo. O lea ua tali malamalama le...

Afioga Fepuleai Faasavalu Faimata Sua (Salega 1): Lau Afioga pe maua se avanoa se i fai atu i le Afioga i le sui usufono mo Faleata, leaga o lea ua tuu mai le avanoa i le sui usufono lea.

Tofa ALE VENA ALE: Ia malie lau Afioga i le Fofoga Fetalai, ua uma lou taimi, e le tatau ona toe tali atu, faagasolo Tualumaga o le tatou Fono. Faafetai.

FOFOGA FETALAI: Ia malie le sui usufono mo Salega, leaga o lea ua faauma mai e le sui usufono, e le mafai foi ona toe tali mai i se isi mataupu. Tulai mai le sui usufono mo Aleipata Itupa i Luga.

Afioga FUAAVA SULUIMALO AMATAGA (Aleipata Itupa i Luga): Faafetai i lau Afioga i le Fofoga Fetalai ua maua se avanoa o le sui usufono mo Aleipata Itupa i Luga e fai atu ai foi se manatu e tusa ai ma le Lipoti a le Komiti.

E muamua ona faatalofa atu i lau Afioga i le Fofoga Fetalai, aemaise foi o le la Itu i le Afioga i le Palemia ma le Kapeneta ma Minisita Lagolago, le Sui Taitai foi ma lenei Itu ma sui usufono uma o le Maota.

E faatalofa atu foi i le faafofogaaga a Samoa i ona tulaga faalupe aemaise o si ou itumalo o Aleipata Itupa i Luga, o i latou foi o i inei i Samoa aemaise foi o i latou o lo o faafofoga mai fafo.

Lau Afioga o le a taumafai e agai pea se vaivaiga o lenei itumalo e agai sao i le Lipoti. O lea ua uma foi le tele o saunoaga, ou te iloa foi e taga tutusa e pei o le saunoaga a lou uso mai Faleata 4, e taga tutusa lava i le tulaga lea. Ae agai sao i le Lipoti ona e i ai vaega, ia e tele foi fesili a lenei itumalo agai i le Lipoti faamolemole.

E taua le tulaga lea na saunoa i ai le Taitaifono o le Komiti. O le saunoaga mautu lava lea sa aumai, e leai se isi e atoatoa, e pei o le tulaga lea e pei e tula'i i ai le agaga o se manatu o lenei itumalo. O le tulaga lea, o lona uiga o la e faamatala mai, e i ai le sasi, e pei foi ona tulai mai ananafi, lape o lauga, o lou uso a sui usufono mai Palauli... Ia ua laki lea na pasi atu le note e Minisita ia e toe faatu le lafo e faasao. Ia o tulaga ia, e laki o lea e mafai ona toe faasao i totonu o le 30 itula. E pei o le Lipoti lea, e 30 aso e i ai nai faasaoga. Ae pei o le mea o lea e tau agai i ai se faamatalaga, o le tulaga lea e aumai i le Lipoti o lo o i ai le Fautuaga 2, ia fai se Tulafono, Legislation Act e clarify ai le mea e tau o le suiga faale-Ofisa ma le suiga tau-lomiga po o le clerical po o le typographical errors.

E i ai se vaivaiga o lenei itumalo, tasi ia o mea o lea e i totonu o le Tulafono Tumau 111, e i ai le malosiaga o le Failautusi e faatino ai mea ia i totonu o so o se Tulafono. E tusa lava po o ua pasia e le Palemene, ae o lo o i ai le malosiaga lea o le Failautusi o le Fono, e faatino ai vaega ia. O lea foi na maua i saunoaga ananafi, a i ai lava le a, o le e, e sui aumai i inei. E i ai lou

talitonuga o le agaga lea o le Tulafono Tumau 111. E i ai mea foi ia, faaitaiga, e i ai le “e”, ae ua misi le “e”, ua le tuu i luma o le l ae ua tuu i tua, afai e i ai se faaupuga, “e le”, ae a toe oso le isi e i tua ane o le l, o lona uiga ua le e le, ae ua lee. E pei o vaega ia ou te iloa o nai vaega laiti ia e galulue ai le Ofisa e faasao, ae le o se mea e toe tau aumai i le Maota lenei.

Ae taua le Fautuaga lea 2, ona o lea e tau fesootai le tulaga lea ma le Fautuaga 4, o lea e aumai ai faaupuga e mautinoa e le Komiti e matua solia le Tulafono. E pei o faaupuga ia o lo o aumai i fautuaga, e fesiligia e lou sui usufono, ma ne i te i ua vave uma lou taimi, ae faapuupuu atu ia se faamatalaga a lenei itumalo, e...

FOFOGA FETALAI: Ia malie maia le sui usufono mamalu, se i tulai mai le Minisita o Galuega.

Tofa Hon Olo Fiti Afoa Vaai: E puupuu lava le fesili. E faafetai mo le avanoa, faafetai foi i le Afioga i le sui usufono mo lona finagalo, ae matau atu e agai lona finagalo i le mea lava lea o le lape ma sina... Ae faafesili atu lava i le Afioga i le sui usufono, i le suiga lea na sui ai nei le Faavae, o le a lou silafia, o se lape e aunoa ma le 2/3 o le Palemene? O le fesili lena lau Afioga.

FOFOGA FETALAI: Ia faaauau le saunoaga.

Afioga FUAAVA SULUIMALO AMATAGA: Ia faafetai. Atonu e agai atu lava le tali i le tulaga lea pe a alu atu le folasaga o le tulaga lea.

Ae o le tulai o lenei itumalo e teena le Lipoti a le Komiti, ona e tele lava fesili a le itumalo. Ma o lo o i ai foi i totonu o le Lipoti lava lenei a le Komiti mea sese foi, mea sese mautinoa la e i totonu. E fesiligia foi la e le itumalo lenei, pe talia e le Palemene lenei le Lipoti a o la e i ai mea sese. O le mea la lea tatou te le iloa pe... ni mea tau...

Afioga Hon Fiamē Naomi Mataafa: Lau Afioga i le Fofoga Fetalai o le mea e fia faasao.

FOFOGA FETALAI: Ia malie le sui usufono se i tuu atu le avanoa i le saunoaga.

Afioga Hon Fiamē Naomi Mataafa: O le saunoaga faalauaitete foi lea o la e i ai mea sese, o le avanoa lea e aumai ai, a o le faapea mai o la e i ai mea sese ma le talia. A faapea e le talia le Lipoti o le finagalo lea o le sui usufono, ae a saunoa mai loa e i ai mea sese la e i ai i totonu, e lelei lava le aumai foi e faamaumau, e mafai foi ona tali atu i ai le tatou Komiti, faafetai.

FOFOGA FETALAI: Ou te iloa o lea ua maua mai e le sui usufono mamalu le saunoaga a le Palemia, e leaga o lea ua e taua mea sese o galuega a le Komiti, e pei ona ou talanoa foi ananafi, o le Komiti o le Palemene. Afai o i ai ni mea sese o e nofo ma oe, ia faailoa mai loa i le taimi lenei, o lea e faafogafoga atu le Taitaifono.

Afioga FUAAVA SULUIMALO AMATAGA: Ia faafetai i lau Afioga, ou te iloa o le a faamuamua atu ia le tali i le Afioga i le Tamaitai Palemia, ona taumafai foi lea e faamanino atu le faafesili foi a le Afioga i le Minisita. O mea sese o lo o i ai, o lo o i ai minute ma faamaumauga a le Komiti. E le o aumai uma minute, ae na o minute lava i le faatalatalanoaga faatolu lea o molimau a le Ofisa. O lena e i ai tulaga i ina i faamaumauga, ou te iloa e le o se typo po o se tulaga o sese tau lomiga. Ou te iloa o ni clerical po o secretarial errors po o vaega ia tau faamaumauga pe a. Se i ou taumafai e sue atu, ae o lo o i ai i totonu o minute. O lau iloa o le attachment lona 2 faamolemole, o lena e i ai le tulaga lena. O lena e sau ai, ua toavalu le Komiti, ae na o le toafitu le Komiti sa tofia ma pasia i totonu o le Palemene lenei. A o lena la ua ta vaai atu i ai, o lena ua toavalu. E pei ua... Ia, atonu e autilotilo pea i ai ma silasila ane i ai i le tulaga lena a o lo o i ai foi nai isi...

Tofa Hon Olo Fiti Afoa Vaai: Lau Afioga i le Fofoga Fetalai, se i ou toe fesili atu lava i le sui usufono mamalu. O lea ua manino lou teena o le Lipoti o lo o aumai ai le finagalo o le Komiti e silasila i le tulaga lea ua sui ai le Faavae. O lona uiga la e te teena le finagalo lena o le Komiti, e saili po o ai ua suia le Faavae ae le aumaia i totonu o le Palemene. O le fesili lena.

FOFOGA FETALAI: Ia, masalo o lea ua maua mai le sui usufono mamalu. E na o le pau lena o lau mea sese lea... e na o le tasi lau mea sese lena ua aumai?

Afioga FUAAVA SULUIMALO AMATAGA: E tele foi typos po o mea faapena, a o le mea lea e tau agai atu ai i le fesili a le Minisita, o le tulaga foi lea o le suiga o le Faavae. O le suiga o le Faavae na pasia i totonu o le Palemene lenei. Ae o le tulaga lea e agai atu i ai i suiga ia e i ai e pei ona aumai i le Lipoti...

Tofa Hon Olo Fiti Afoa Vaai: Lau Afioga i le Fofoga Fetalai o se mea e fia faasao.

Afioga FUAAVA SULUIMALO AMATAGA: O suiga ia o lea e ala ai ona avatu se faamatalaga, clarification po o mea ia e tau o clerical po o secretarial errors po o mea... e le o ni typo. A o le mea lena o lea e fai mai

ai foi le fautuaga, fai se Tulafono e clarify vaega ia e faamanino ma faamalalama.

FOFOGA FETALAI: Ia tulai mai lau Afioga i le Minisita.

Tofa Hon Olo Fiti Afoa Vaai: Lau Afioga i le Fofoga Fetalai, ou te tau matau atu e lost le sui usufono i le Lipoti lea. A lea e manino le suiga lea faapea, e tuu i ai se fuaiupu lea e vagana le approval a le Peresetene. O si mea lena o le Faavae lea na sui, e le i suia i totonu o le tatou Palemene. Ou te iloa po o e tau malamalama i ai i le vaega lena.

FOFOGA FETALAI: Ou te iloa e... e faamanino atu ina ia maua i lou finagalo lau Afioga i le sui usufono mamalu, ona o le mea lea e taumafai mai ai le Minisita. E ese le Faavae na sui atu i le Palemene, ese le mea na sui i tua. E pei o le uiga tonu lena, ia malamalama ai foi le sui usufono mamalu.

Afioga FUAAVA SULUIMALO AMATAGA: Ia faafetai, o lea e manino lelei i ai le sui usufono mo Aleipata Itupa i Luga. A o le tulaga lea pei ona avatu i ai se faafesili. O nai suiga, a outou silasila foi i imeli ma le agaga la e aumai ai, o le tele foi o Tulafono tuai o Fanua ma Suafa, e i ai lava le fasi fuaiupu faapea, ma o lea e i ai fautuaga. A silasila foi i mea na fesiligia ai Loia Sili, o le Failautusi o le JSC, ia faapea foi...o i latou ia e i ai le agavaa ma le poto faapitoa i mea tau Tulafono. E pei o i ina lea e tau agai atu i ai, ona e aumai ai se ...na o se fautauga e aumai e fesoasoani. E le faapea na sau se isi i fafo sui, na aumai i totonu o le Failautusi o le Fono ina ia consider vaega ia mo le teuteuga. Ona e i ai le talitonuga o lena itumalo, o faiga o Tulafono, o lea e i ai i latou e poto faapitoa, o le latou profession lea, e i ai ia fuaiupu o laina ma vailaina, e fesootai ai le isi fuaiupu i luga ma le isi fuaiupu i lalo. E pei o le tulaga lena, o lea foi e taumafai e fai se Tulafono ia more practical e mafai ona faatino i le tulaga lea.

FOFOGA FETALAI: Ia malie le sui usufono se i tuu atu le avanoa i le Minisita o Faatoaga.

Susuga Hon Laauli Leuatea Polataivao Fosi: E leai, o le agaga lava lea o le tatou Fono o le tatou fesoasoani a'i. O lea lava e apaapa atu, a fai o ni suiga ua toe manatu le Peresetene e fai, e le faia i fafo i o, o le mea lena e tataua ona faasao, e fai i totonu i i. Ae e le o le manao loa o ia e fai, alu ifo loa fai i fafo i o i le Failautusi o le Fono, ma ave ai i o i Le Ao o le Malo e toe saina. O le agaga lena o lea e tau avatu. E le faia i fafo i o, e fai i totonu o le Palemene le suiga o le Faavae, i le 2/3. E pei o se mea noa ia outou le tou fai mai, a fai e mafai ona fai, e sui ai lava i o. E le faapena ona fau Tulafono a le atunuu. O le ala lea o le fesoasoani atu. Aua e te faalogo ia

Leaana e sese ai lou manatu. Ia sagatonu mai lau faalogo o lea ou te fesoasoani atu. E ava atu i le sui usufono, leaga o lea e faamalamalama atu, ioe o le agaga lena.

Afioga Leaana Ronnie Posini (Safata 1): Lau Afioga i le Fofoga Fetalai, ona ua taua lou igoa. Ae leaga o le Minisita o Faatoaga, e le alu ai i ni Tulafono, ae o lea ou te talanoa atu i le Tulafono ma le agaga faaaloalo.

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai, o si mataupu a sia e tusa ai ma le saunoaga a le sui usufono mamalu mo Aleipata Itupa i Luga. O le tulaga lea e fia faamalamalama ona o lea e aumai i totonu o le Lipoti. E 11 ia suiga sa laga mai ua pau, e le Peresetene. E 8 suiga ia na talia e le Ofisa, fai mai le Ofisa e sao, e tatau ona faatino. O lea e fai mai le Ofisa, o lena ua fai ai suiga ona e sao le Peresetene, e le feauautai le faa-Peretania ma le faa-Samoa. O lea la na talia, ae 3 suiga e le i taliaina ona e fai si ese mai le mea lea sa pasia e le Palemene. E pei la o nisi nai suiga ia e aumai, o fuaiupu, o numera, sui lea i le 69 i le 81, e tumau le 94 i lalo o le 104, sui le upu Sui Peresetene i le upu Peresetene Lagolago.

FOFOGA FETALAI: O e lagolago i o, po o e faauilavea i le saunoaga a le sui usufono?

Tofa Hon Laufo Fonotoe Nuafesili Pierre Laufo: O lea ou te faauilavea lau Afioga. E pei o le fesoasoani atu i le tulaga o mea e fia faamalamalama.

FOFOGA FETALAI: E pei o le a tau ese le tatou... pei a tau tatai ese le tatou mataupu i lau saunoaga. Ia faaauau lau saunoaga le sui usufono mamalu.

Afioga FUAAVA SULUIMALO AMATAGA: Ia faafetai, atonu o lea ua saunoa atu le Sui Taitai o lenei itu e faamanino se faamatalaga.

FOFOGA FETALAI: Ia onosai mai se i saunoa mai le Taitai o le Malo.

Afioga Hon Fiaame Naomi Mataafa: Ae le i see ese le sui usufono mamalu, o au lava lea ou te faalogologo ma le totoa, o lea lava tatou te talanoa i suiga na aumai e le Peresetene o le Faamasinoga o Fanua ma Suafa. Lau Afioga i le Fofoga Fetalai, tatou te le talanoa foi i le tumaoti o Vaega ma Itutino o le Malo. O le mea lea, o lea e momoli mai i le ata lea, sopo mai le Itutino le la i i. O se mea sao lena mea? Ae le uia ia ala...o lea tatou te talanoa i mea ia, ae o lea e pei ua ou faalogo atu, o le mea foilea pe sao le

faiga lea. A loto lava le Faamasinoga e fai mai i le Palemene, fai le mea lea, fai le mea lea. O lea ou te maua atu i le saunoa mai a le sui usufono. A sau, fai atu i ua lelei. A fai galuega faa-Ofisa, o galuega faa-Ofisa masani, o le sui usufono foi sa masani ona Ofisa. Ou te le iloa po o mafaufau faa-Ofisa ae le mafaufau faa-sui usufono.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ona o lea e pei e maua atu e sagai mai i lou sui usufono ia le saunoaga a le Palemia.

FOFOGA FETALAI: E leai o la e agai le Palemia agai i o i le sui usufono mamalu.

Tofa Hon Lauofo Fonotoe Nuafesili Pierre Lauofo: O lea ou te iloa e leai se Ofisa o le sui usufono mamalu na faia.

FOFOGA FETALAI: O la sa faigaluega faa-Ofisa.

Tofa Hon Lauofo Fonotoe Nuafesili Pierre Lauofo: E pau lava le mea lea na ou tulai atu ai, o lea na ou faitau atua le mea lea mai o i le Lipoti.

FOFOGA FETALAI: Ia malie lau Afioga i le Sui Taitai.

Afioga Hon Fiamē Naomi Mataafa: O le tulai mai o le Sui Taitai, e sese i Sini, o lau fai atu i le Ofisa, o lea e silafia lelei lava, o le Afioga i le sui usufono sa faauluulu i ai se tasi o Matagaluega, official.

FOFOGA FETALAI: Ua e maua mai lau Afioga i le Sui Taitai. Ia faaaauau lau saunoaga lau Afioga i le sui usufono.

Afioga FUAAVA SULUIMALO AMATAGA: E leai o le agaga lea e avatu e le sui usufono lenei, o tulaga, o suiga lea ua i ai i totonu. Ae pei o le tulaga lea, o lea ou te autilo i le 111. O a suiga e oo i ai le malosi o le Failautusi o le Fono? O a suiga? O le mea lena o lea pei ou te fiafia, e manaia le Fautuaga lona Lua, lea e fai mai, fai se Tulafono i le faiga o mea nei o Tulafono, Legislation Act, o la e i ai i le Fautuaga Lua. O lona uiga e aumai lava faamanino, a umi loa le fuaiupu, aua le talia. Ae a sui loa le “la” ma le “le”, e pei o nai mea na o lea e tau fai atu ai, e fai nai mea ia, ona o la e le o manino.

FOFOGA FETALAI: Mo le suiga o lou taimi lau Afioga i le sui usufono. Ia tulai mai lau Afioga i le Minisita.

Susuga Hon Laauli Leuatea Polataivao Fosi: Lau Afioga i le Fofoga Fetalai, e tatau lava ona faamanino le tulaga lea. E le faapea o le Tulafono Tumau lena 111, ona mafai ai lea ona fai o so o se suiga, suiga laiti, faaupuga ma le sapelaga ma mea. A o se suiga e sui ai le agaga o le Tulafono, e le mafai ona fai. O le mea lena e tatau ona faamanatu atu. O lea foi ua saunoa le Afioga i le Tamaitai Palemia, e le o le process lena e fai ai le mea. O le auala e na o le toatasi lava le tagata e faia suiga, e na o le Failautusi o le Fono, ma le Loia Sili i lana fautuaga e aumai. Ae a aafia loa se isi tagata, i le mea lea ua matauina, ua aafia i latou e le tatau ona aafia. O i lea e i ai le popolega, leaga ua lalaa mai i, i o e fai suiga ogaoga ia. E le o le process lena e fai ai galuega o le suiga ma le faasolomuliga o Tulafono. E agai pea i le Kapeneta e fai lana galuega pe a ua i ai itu ogaoga. Ae le faapea o le 111 e saoloto o so o se suiga lava, ia faaeteete leaga e sui ai le agaga o le Tulafono. E le o le mea lena na pasi e le Palemene.

FOFOGA FETALAI: Ia, le sui usufono mamalu.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai,

FOFOGA FETALAI: Le sui usufono mo Falelatai, e te faauilavea i le saunoaga?

Afioga Lupematasila Galumalemana Tologata Togia Tile Leia: O se mea e fia faamalamalama, o lea ou te fia fesoasoani i lou uso a sui usufono, ua ou vaai atu ua matua mafatia lava i le Itu le la o le Maota.

FOFOGA FETALAI: E leai la, e i ai lava lou taimi e te tulai mai ai faaali mai lou finagalo ma fesoasoani mai. Ia faaauau mai le saunoaga a le sui usufono mamalu...ma o lea ua faamanino mai.

Afioga FUAAVA SULUIMALO AMATAGA: Ia faafetai, o le saunoaga foi a le Minisita, e e leai se faaupuga ua ou fai atu, fai so o se suiga, e leai se mea faapea ua ou fai atu ai. A lea na fai atu, o le mea lea e fia clarify, faamanino i se Tulafono, o le a le mea e tau so o se suiga, o le a le suiga laititi o le a le suiga tele. E pau le mea lea e sau i le 111, e mafai e le Failautusi o le Fono, ona fai ni suiga tau lomiga ma suiga tau Ofisa. E pei la o le tulaga lea, e na o le pau lea o le vaega o le Fautuaga lea e lagolago e lou sui usufono. A o le Fautuaga 4, e...

FOFOGA FETALAI: Ia malie le sui usufono se i tuu atu le avanoa i le Tamaitai Palemia.

Afioga Hon Fiamē Naomi Mataafa: O le mea e fia faasao. Ua tatou talanoa nei i le tulaga e sui ai, e faapefea ona sui, a o a mea e talafeagai ona sui? Ia malie lau Afioga, e leai ma se lauga ua talanoa i mea ia na sui. E leai ma se lauga, i mea ia na sui. O a mea ia na sui? O le filifiliga o faamasino. O le pule faitalia a le Peresetene o le Faamasinoga o Fanua ma Suafa. O mea ogaoga na e lua ia na aumai i le faataitaiga lea. O le a la le mea lea tatou te talanoa ai. E talanoa i le tulaga lautele? E leai ma se lauga ua tilotilo, po o a mea ia e sui, ae o le a le taunuuga o suiga na, lau Afioga i le Fofoga Fetalai.

FOFOGA FETALAI: E talitonu o lea ua manino le faamalamalama a le Afioga i le Palemia.

Afioga FUAAVA SULUIMALO AMATAGA: Ia faafetai i lau Afioga i le Fofoga Fetalai, e leai o lo o manino lava le tulaga lea e pei ona aumai le lipoti a le Ofisa o le Fono, o lea e aumai manino, o lape a le Ofisa. A o le mea lea ou te talanoa atu ai au, ou te le taliaina le mea lea, e so o se suiga. E le o avatu ai se manatu o lenei itumalo. E pau le mea, ia vaai po o a suiga e mafai ai ona oo le malosia lea o le Failautusi, ia o suiga na e tataua ona fai. A o nisi suiga, aua na i ai foi suiga ia na aumai i totonu. A silasila foi i le table lea o le analysis a le Komiti. O lea e i ai nai suiga, o la na aumai le imeli, e fautua i ai ina ia aveese le faaupuga lea. E pei la o le itulau e 9, o lona e i ai le vaega muamua o le fuaiupu e 46. E le tataua i le Faamasinoga o Talosaga, e faasaga i se faaiuga ma iloiloa a le Faamasinoga o Fanua ma Suafa. O lona foi e toe oo mai i lalo i ina, o lona e sau, se faatagaga e talosaga ai se faasaga i se faaiuga.

FOFOGA FETALAI: Ia saunoa mai lau Afioga i le Minisita.

Tofa Hon Olo Fiti Afoa Vaai: O se mea e fia faamalamalama. Sa fesiligia e le sui usufono mamalu tulaga po o a ituaiga suiga e fai e le Ofisa. O mea ia o misspelling o upu, o mea faigofie na. O le faataitaiga a faapea o le upu safe, s.a.f.e, ae sipela atu ua s.e.f.e, ona toe tuu laia, o suiga na. E faapena le faiga o misspelling ma mea faapena. A o se upu o le sui o se mea e sui atoa ai le uiga o le Tulafono e le mafai.

Afioga FUAAVA SULUIMALO AMATAGA: Ia faafetai lau Afioga, e eseese so matou talitonuga...

FOFOGA FETALAI: Ia se i fesoasoani atu pea le Nofoa, ona o lea o le a... ae ua maea ai foi ma lou taimi. O le faafaigofie o le tatou mataupu, leaga o lea ua e talanoa mai i le Vaega 111, lea e pei ona saunoa le Minisita. O le Vaega patino lava lea a le Failautusi pe a faapea e i ai ni feseaiga o spelling ma mea na. Ae a e silasila i le Lipoti, lea e taatia i le Palemene, e ogaoga

lava mea ia e tulai mai. O le mea lena ia tatou iloa foi ona vaevae le eseese o mea. O le 111 i le tatou Tulafono Tumau, e tasi foi le masina e faatino ai, ae peitai o le uiga lena. E leaga o lea e taatia i le Maota le Lipoti auiliili a le Komiti. E le o ni spellings lea e faaletonu, e i ai mea ogaoga o lea e talanoaina i le tatou... Ia faauma maia aua ua maea lou taimi.

Afioga FUAAVA SULUIMALO AMATAGA: E faamalulu atu i lau Afioga i le Fofoga Fetalai, ona o lea ua uma lou taimi na o faauilavea ia e i ai, ae o lea e lei uma atu ni motugaafa a lenei itumalo. O lea e i ai Fautuaga na aumai e latou o lo o i ai agavaa ma latou poto faapitoa, o le latou profession lea, i le tulaga e tataua ona... aua o lea e sau o le term of reference lona 4, po o le a se fofo e omai ma le Komiti. E pau lava le recommendation lea ou te vaai i ai, molia, fai moliga. O lea na fautua mai le AG, o lo o i ai vaega o le tatou Tulafono Tumau e toe aumai ai suiga i totonu o le Palemene, e pasia atu tulaga ia e pei ona... ae ese foi le mea lea e agai i ai le Komiti. O le Fautuaga lava, fai moliaga, fai moliga. Ou te alofa o le aufaigaluega, o le a faapefea ona malu le aufaigaluega i le Maota lenei? O lea ua i ai le faaupuga lea faapea, e leai se isi e atoatoa. A silasila foi i faaupuga o la e i totonu o felafolafoaiga a le Taitaifono ma le latou Komiti ma le aufaigaluega, se o na e i ai tulaga na foi lea pei e faaoleole ae toe aati. Ia o na e i ai faaupuga faapena, matou te le faataua foi ni sese, ae tuu ni galuega lelei na outou faia. O lea foi e toe sau ai foi ma le isi faaupuga, e mafai ona aveia lau uo mamae ma se fili. A o le agaga o le Komiti o se fili ia fai ma uo mamae.

FOFOGA FETALAI: Ia faamaea maia le saunoaga ua maea lou taimi.

Afioga FUAAVA SULUIMALO AMATAGA: Ia o le ava tele atu i lau afioga i le Fofoga Fetalai, faafofoga foi si ou itumalo ia e tele lava nai tulaga o lo o taumafai atu i ai, ae o le tulaga lena o lea ua avatu ai le tetee a lenei itumalo, ona o lo o i ai foi le sasi a le Komiti, o lo o i ai foi nai sese ia ou te le iloa la po o se typo po o a ituaiga mea ia. O lea e i totonu ae o lea ua ou tauina atu mea na ou tau i ai.

E tele foi e eseese tulaga ia e 2 o le type o le sipelaga ae o le mea lea tau clerical errors, ia o mea na e fetuutuunai. Aumai fautuaga a loia ma latou e ona le profession, e le feoeoeai le Tulafono, a o lea foi e fai mai, e le pau ai le aano, substance o le Tulafono ma lona faatinoina.

FOFOGA FETALAI: Faafetai, o lea ua maua, faamauina lou finagalo.

Afioga FUAAVA SULUIMALO AMATAGA: Ia e faamaea atu ai se faamatalaga, e faamalulu atu i lau Afioga, aemaise foi o le la Itu i se upu foi

ua sala pe paopapa ma le tautamalii i la outou faafofogaaga, ia toe faafoi mai i le sui usufono o Aleipata Itupa i Luga.

E pau le tatalo faamagalo e le Atua se leo o lenei itumalo. Alofagia e le Atua toega o lenei aso, ae o se leo vaivai lena o lenei itumalo.

Manuia le tatou Fono.

FOFOGA FETALAI: Ia malo saunoa i le sui usufono mamalu mai Aleipata Itupa i Luga. Ia talu ai o lea ua tatou taunuu i le taimi o le malologa o le taeao, o le mea lea o le a faataatiaese galuega a le Fono Aoa mo lana malologa masani o le taeao.

Na faataatiaese Taulumaga a le Fono Aoa Faitulafono mo lana malologa masani i le itula e 10:35 i le taeao ma toe faaauau i le itula e 11:08 i le taeao.

FOFOGA FETALAI: Ou te faasilasila atu ua toe amatalia nei ia Taulumaga a le Fono Aoa Faitulafono. E talitonu ua maua se faasiligamalosi i le paia o le Maota aua foi le tautega ma le taligasua i lenei taeao. Ia malo le onosai.

Faafetai foi i le tatou Ofisa mo tapenaga uma. Ia ae i ai le manatu o le Nofoa, ia o lo o faamamafa lava e le Nofoa le talosaga a se tasi o sui usufono matua o lea Itu i le aso ananafi ia Hon Tapunuu Niko Lee Hang. Ia ona o lo o tele foi ia tatou galuega o faatali mai aemaise lava le Komiti o Tupe. E i ai le agaga o le Nofoa, ia o ituaso faapenei tatou te fetuutuunai lava i le auala ina ia faaofi uma i ai ia tatou galuega o lo tatou valaauina.

E manatu foi i le talosaga a se tasi foi o sui usufono matua o lena Itu, ia e pei o le agaga lena o le Nofoa. O lea e faafogafoga mai ia le Itu a le Malo, ona o le aso lenei e tatou te manava i le 12:00, ia ae ua tapena foi ia le tatou Malo ma le Komiti ina ia faamalieina uma foi ia saunoaga e pei ona agia i le Maota. O le mea moni lava ia ua maua uma lava lo tatou Malo ma le Taitaifono ia finagalo ua faaalua ia ma le taunuuga ma se fofa e tuuina mai.

E le mamatia foi i le Tamaitai Palemia ma le Kapeneta ma le Faigamalo ia o outou finagalo foi faaalua i lenei vaega o Tulafono ua tuuina mai e taua tele. Ae manatu lau Afioga i le Sui Taitai ma lena Itu ua manatu tele atu, ia ua vaai lava le Nofoa i le talosaga foi a lena Itu se tasi foi oe sui usufono matua o le Maota ona ua tele a tatou galuega e fia faagasolo.

Ia o le a se finagalo o lena Itu o lea ua tapena le lafo a le Palemia ma le Taitai o le Malo aua mea uma ia ua outou lagaina mai. Atonu o se mea tou te fiafia ai foi ma o tatou fiafia uma ai aua le agai i luma o le tatou mataupu. E pei o le agaga lea ma le faaloalo i lau Susuga i le Taitai.

Tofa Hon Lauofo Fonotoe Nuafesili Pierre Lauofo: Faafetai i lau afioga i le Fofoga Fetalai, ia faafetai foi i le tofa ua faaalua e lau afioga i lenei itula o le aso ua oo i ai le tatou Fonotaga ma le amanaia foi o se tuualalo a le afioga ia Tapunuu i le aso ananafi, ia aua foi le faagasologa o le tatou Fono o le tele foi Fonotaga faa-Komiti Faa-Palemene aemaise lava le Komiti o Tupe aua o lea ua folasia ma taatia i le Laulau-a-fono ia le tatou Tala Faatatau Autu o le Tupe ua tataua foi ona faagasolo galuega.

O le a sou finagalo e toe 2 lava nai a matou sui usufono ia ae ua lava se tai 5 minute e ave i ai. Ia aua ana faapea e faapena ona faamalie ai. Ae o le talosaga lea ma le agaga faaaloalo.

FOFOGA FETALAI: Lau afioga i le Taitai o le Malo pe o le a sou finagalo?

Afioga Hon Fiamē Naomi Mataafa: Lau afioga a 5 minute pe lava a maua foi ni tai 5 minute se sui usufono e toalua o matou ia faamolemole.

FOFOGA FETALAI: Ia o lea ua aumai lua talosaga lau afioga i le Sui Taitai ma le Taitai o le Malo, ia sa faapea e maua mai le agaga o le Nofoa, ae ui i lea, ia o le a maua le avanoa o tatou sui usufono e toalua mai i lea Itu, ia tai 5 minute.

Ia tulai mai le sui usufono mo Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA: Faafetai tele i lau afioga i le Fofoga Fetalai mo le avanoa o lenei foi itumalo o Falelatai ma Samatau e faaalua ai se manatu i le lipoti a le Komiti. Ia e ui ina tuli tamoe ia le tatou galuega ona o le tele foi o nisi o feau taua o faatalitali mai ae faafetai mo le amanaia ma le avanoa ua mafai ona maua.

O le mea lea o paia o lenei Palemene ma le faafogafoga tapuai maimoa mai a lo tatou atunuu manatu o le a faatalolo, ae o le a agai sao se manatu o lenei itumalo e tusa o le Lipoti a le Komiti e pei ona i luma o le Palemene.

O le Viiga i le Atua ona o le apulu o tofaga ma le falaefu i lau afioga i le Taitaifono faafetai ua taulu taulu le finagalo o le Atua ia o lea ua toe faafoi lou malosī. Ua mafai ona tatou feiloai e toe faaauau ia le tatou galuega. Ia ae o le fautuaga lava ia faifaimalie ia ou faiva. O le tatou galuega ma le malaga, ia e i ai le manatu e.. o le malaga e mama e avegasii.

E amata atu se tala a lenei itumalo i le afuaga mai lava o lenei mataupu. E pei o lea e matau e lenei itumalo, o le afioga i le Loia Sili sa usu i le mataupu lenei lea na fanau mai ai le suesuega ma le uluai lipoti a le Failautusi ma le Ofisa o le Fono lea na tuuina mai i lenei Palemene, fanau mai ai le Komiti Faapitoa lea e ana le lipoti lea i luma o le Palemene.

E matauina e lenei itumalo le mau a le Ofisa o le Fono, o le sese o le sese o le Ofisa. O lea foi sa faaauau ia le latou mau lea i le suesuega a le Komiti sa feagai ai. Peitai, e i ai lava nai vaega laiti e tau faanoanoa ai ona e pei ona maua i nisi o saunoaga a sui usufono mamalu, matauina lava e faa 3 ona tuuamiami foi nisi o molimau. I lau la matau i lenei itumalo, e pei e foliga mai sa tulituliaupu lava e le Komiti ia molimau, ina se i faapea mai, o le afioga a le Peresetene na faatonuina matou e tuu suiga ia i totonu o le Tulafono.

E pei o le faanoanoaga lea i lenei itumalo. A silasila i le suesuega o lenei mataupu i le afioga i le Peresetene, o le tofiga o le Peresetene, e le o se tofiga maualalo. O se tofiga taua ma taualoa. E tulaga tutusa ma le Faamasino Sili. Ae faanoanoa lava, e faanoanoa i tuuaiga ia ua aumai e le Lipoti. E le o mafai ona afio mai i i se i tali i tuuaiga ia. O lea ua matua molioo mai lava i le Palemene, ma faapea mai, na matua oo mai lava ia le afioga i le Peresetene e faatonu ia le afaigaluega a le Ofisa o le Fono, ia tuu i totonu suiga ia.

E ui ina tautino mai ia le Peresetene i lana molimau, e ese lava lana mataupu na oo mai ai i le Ofisa o le Fono, ae o lea ua matua aumai lava i se auala le lelei, e tauvaleaina ai ia le afioga i le Peresetene. O le agaga faanoanoa lea o lenei itumalo.

Ae e pei lava ona felafuai i lenei aso ma ananafi, malamalama le sui usufono lenei i le procedure ma le process e faaulu ai se Tulafono fou po o se suiga i se Tulafono o Teuteuga o le Faavae, lea lava sa mulimuli ... O le Loia Sili, o le Ofisa Sili o Pulega o le Matagaluega e ana le Lipoti, o le Failautusi o le Fono, o i latou ia e tuu atu i ai le faatuatuaga, latou te fetuunai i suiga sa pasia e le Palemene, mo le faaofiina ai o le Ao o le Malo.

Ae o lea ua o tatou tuuaia ia le afioga i le Peresetene, o le afioga a le Peresetene e ana le Tulafono lea e tatou te tapisa ai. O lea sa faatino ona tiute, e aumai ana fautuaga i lona talitonuga, o mea ia sa talanoaina ma pasia e le Palemene ma le Komiti.

Ae e i ai ia lou talitonuga, o le Failautusi o le Fono, o i e gata ai ni suiga e le i pasia e le Palemene lenei ma le Komiti Faapitoa. O le Failautusi o le Fono a lea ua tautino le Failautusi o le Fono ma le Maota Fono ma le Ofisa o le Fono, o le latou sasi ua pasi le 30 aso, sa tatau ai ona faaofi i totonu ia suiga ia, mo le toe tuuina i ai o le maliega a le Ao o le Malo.

O le isi foi itu taua e fia oo i ai se tala a lenei itumalo, e le o aumaia i le Lipoti lea, molimau tusitusia a le Loia Sili, o le Loia Sili talu ai, o le Peresetene, o le Komesina o le Law Reform, e taua ia le latou fautuaga lea na aumai. O le latou molimau, o suiga ua faatino nei, e leai se afaina tele o le Tulafono. E pau le fautuaga lea e latou te aumai, tuu i tua le Tulafono
111...

Afioga Hon Fiamē Naomi Mataafa: Lau afioga i le Fofoga Fetalai...

FOFOGA FETALAI: Tuu atu le avanoa i le afioga i le Palemia...

Afioga Hon Fiamē Naomi Mataafa: Ona o lea ua oo le saunoaga a le sui usufono i le fautuaga mo le suiga. E leai se afaina o le Tulafono.

Lau afioga i le Fofoga Fetalai, o lea ua i ai le afaina o le Tulafono, o lea ua nofo ia le galuega a le Faamasinoga. E faafefea la ona tatou fai mai e leai se afaina o le Tulafono? O lea ua le mafai ona faagaioi, fai mai e a le Faamasinoga Maua luga? E leai se Tulafono e faavae ai le tofiga o faamasino. Ao ai e faia le galuega a le Faamasinoga? O Faamasino, o le a la lea mea o le leai o se afaina lau afioga?

FOFOGA FETALAI: Ia ou te iloa lea ua...

Tofa Hon Olo Fiti Afoa Vaai: Lau afioga i le Fofoga Fetalai...

FOFOGA FETALAI: Ia se i tulai mai mo le faasaoina o lou taimi. Tulai mai lau afioga i le Minisita o Galuega...

Tofa Hon Olo Fiti Afoa Vaai: O le faaopoopo atu lava i le saunoaga foi a le Tamaitai Palemia. E i ai isi vaega e 2 tetele a lo tatou Malo ua afaina. Afaina muamua ia le Palemene, ao le afaina lea e tatou te tilotilo ma taumafai e e tanutanu ia le tuumauaaloina o le afioga i Le Ao Mamalu o le Malo i lona saina o se mea sese ua avatu ia te ia.

O le mea foi lena sa ou faapea i le sui usufono, e na te puipui le Tama Aiga le Afioga Tuimalealiifano. Ae o lea ou te tau faalogologo atu, e pei e mama ia ia tulou lava o le upu e to ia te au le tauvlea ma le taumamaina o lana afioga i Le Ao Mamalu o le Malo. Sa tatau ona tulai mai puipui leaga o lana matafaioi lea.

FOFOGA FETALAI: Ia e talitonu le sui usufono mamalu o lea ua faamanino. O le manatu lava o lea ua... sa le faalavelave a o e sausaunoa leaga e na o le 5 minute lea na tuu atu, ae manatu tele o lea saunoa ia le Palemia le Taitai o le Malo, ua poloka nei ia le tatou Faamasinoga o Fanua ma Suafa ona o faaletonu. E pei la o le uiga lena, aua foi ne i manatu mama i tatou i le tulaga lea ua i ai le Faamasinoga o Fanua ma Suafa leaga o measina a le atunuu.

O le ala lena o lea e mamafa i le finagalo o le Palemia ma le Malo, ia o le tulaga lena. O lea ua maua le agaga o lea foi ua faafogafoga atu le Maota, ia ua maea foi lou taimi lea ua uma lou 5 minute na faatu mai e le tou Taitai.

Afioga LUPEMATASILA GALUMALEMANA TOLOGATA TOGIA TILE LEIA: Lau afioga i le Fofoga Fetalai, e leai se manatu e faatauta i le afioga i le Palemia ma le afioga i le Minisita.

O le atunuu foi lenei e tumu i le taufaaviivii ae e le seetia ai foi i le malu o le tai taeao. Ae fia tulituli le taua o le finagalo o le afioga i le Palemia, o le fesili lea e tulai mai, fai mai ua toa galuega a le Faamasinoga ona o le Tulafono lea. Ae o le talitonuga o lenei itumalo, o fea le Tulafono e saini le Ao o le Malo i le Tulafono, o le Tulafono lena e faaaoga. Pe sese, leai seiloga e faaaoga e faaleaogaina le maliega a le Ao o le Malo...

FOFOGA FETALAI: Ia....

Afioga Hon Fiamē Naomi Mataafa: Lau afioga i le Fofoga Fetalai, o le mea e fia faasao...

FOFOGA FETALAI: Ia se i saunoa mai lau afioga....

Afioga Hon Fiamē Naomi Mataafa: E fia tau atu i le sui usufono mamalu, e le o se faaiuga a le Malo. E le o se faaiuga foi a le Palemene. O le faaiuga a le Faamasinoga.

O le mea lena e fia faamalamalama ma faasao.

FOFOGA FETALAI: Ua e maua mai le sui usufono mamalu? O le... atonu e le o oo tonu lou finagalo i le mea o tulai mai i le taimi lenei o le a taatia ia le galuega a le . O le faaiuga a le Faamasinoga Mauauga lea ua i ai nei, o le a taatia ia le galuega a le Faamasinoga se i toe vaavaai i ai ma siasila i ai le Maota.

E faigofie ia, ae manatu foi ia ua maea lou taimi o lea e tau fai le tatou galuega, faauma maia lau saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau afioga, o lea o le a faauma atu se manatu. O le fautuaga lea e aumai e le Lipoti a le Taitaifono ma le Komiti, e matua teena lava e lenei itumalo, teena i ona itu uma ona o mafuaaga pei ona taumafai e tolaulauina atu.

Sa saunoa le afioga i le Taitaifono ma le Komiti, i le taumamaina o le Palemene lenei. Silasila i fautuaga ia e aumai...

Afioga Hon Fiamē Naomi Mataafa: Lau afioga i le Fofoga Fetalai, o le mea e fia faasao, ua uma le taimi...

FOFOGA FETALAI: Onosai mai le sui usufono se i tuu atu le avanoa i le Palemia.

Afioga Hon Fiamē Naomi Mataafa: O lea e fia maua avanoa o isi sui usufono. Malie ia le sui usufono.

FOFOGA FETALAI: Malie le sui usufono mamalu, o lea ua faamau lou teena, ia ae i ai le manatu ia, e le toe i ai foi se mea e manaomia ai se isi faamatalaga i tua atu o lea ua faamau lou teena o le Lipoti a le Komiti.

Afioga LUPEMATASILA GALUMALEMANA TOLOGATA TOGIA TILE LEIA: Faafetai o lea ua faauma atu.

FOFOGA FETALAI: Ua maea lou taimi.

Afioga LUPEMATASILA GALUMALEMANA TOLOGATA TOGIA TILE LEIA: O le mea lea sa tau tulituli atu, i le fautuaga lea e aumai, ua matua tuumauualalo lava e le Taitaifono ma le Komiti le Palemene lenei e tusa ai ma le fautuaga e tiai i tua le Tulafono. E faafefea na tiai i tua?

FOFOGA FETALAI: Ia o lea ua...

Afioga LUPEMATASILA GALUMALEMANA TOLOGATA TOGIA TILE LEIA: E manatu mama i le Palemene. Ia...

FOFOGA FETALAI: Ia, o lea ua... E fautua atu le sui usufono mamalu, ua maea lou taimi. Ua maea lou taimi.

Afioga LUPEMATASILA GALUMALEMANA TOLOGATA TOGIA TILE LEIA: Ia, o le manatu lena o si nei itumalo, ia manuia lau Afioga i le Fofoga Fetalai ma le Palemene.

FOFOGA FETALAI: Ia, e matau atu o lea ua fou mai le sa o le sui usufono foi o Tuisamau. Ia, o lou avanoa lenei, ia ma o lea ua tasi ai lena Itu o le tatou avanoa mulimuli lenei. Ia, lou 5 minute lau Afioga i le sui usufono mamalu.

Susuga MAULOLO TAVITA AMOSA (Sagaga 2): O lea o le a ou taumafai e faaofi lau tapenaga o le afa itula i le 5 minute. E faamalulu atu le faafofoga tapuai Samoa ma lou itumalo, ona ua utiuti le taimi, ia o le a agai sao loa i se upu, aemaise foi le faafetai i le sui usufono o le itumalo lea o Fasitoo lea ua tuu mai le avanoa ou te tulai ai ae tapuai. O upu a le atunuu, e tetele a pesega ae matua lava i le oo. Po o fea lava tatou te tetele i ai, o le tofa saili e matu i ai le atunuu.

E momoli lau faafetai tele i le Taitaifono o le Komiti lea sa faia le suesuega. O ana upu tomua lea foi na toe sau anapo i le TV, sa matou saili le tofa i lagi, matou saili le tofamamao ma le utaga loloto i le sami loloto. O nisi o upu, ua le o se taeao faataitainono, po o se taeao sa tuimalae. O upu loloto ia o le tatou vaogagana e atagia ai le taua o lenei mataupu.

I lau la matau i le mataupu lenei, afai tatou te saili le tofa i le sami loloto, o upu lava e masani ai le atunuu, aua le tuliloaina le lauamanu, ae vaai po o fea o i ai le faamulioatu.

Lau Afioga i le Fofoga Fetalai, o le Lipoti mafiafia lenei na tapena i ai le komiti lea, o le tofa lea na saili i le sami loloto. A o ai le faamulioatu? I lou lava vaivaiga, o i latou tonu e fitoi i ai le matafaioi o le vaaiga o Tulafono O le tele ia o molimau na aumai, taoto ia, a o le molimau ou te fia tuliloaina, o Loia, o le Loia Sili a le Malo le sa i ai ma le o lo o seei mai nei, aemaise foi le Failautusi o le Maota lenei. E toafitu latou ia e taga tutusa uma lava o latou finagalo. Pau lava le mea o lea e pau ai toeitiiti lava atoa le Lipoti, ona e le o aumaia i i se upu i le fautuaga a le Loia Sili o le Malo lea o lo o seei mai nei. O lea la na ou saili pea ma ou saili pea ou te fia maua, o lea la na ou maua i le aso Lua 15 Mati i le fono lea a le Komiti lea o lo o i ai i le itulau e 11 le fautuaga lenei, lea o lo o faapea mai, e mafai ona fai se lafo e faataatiaese le Tulafono Tumau lea ona na o le 30 aso e aoga ai, ae toe aumai se isi lafo e toe teuteu atili ai suiga ia ona aumai lea e saina Le Ao o le Malo. O lena.

O suiga ia o le a ou le toe agai i ai, lea foi na saunoa ai le tele o sui usufono, i le 15 o Tesema na pasia ai le Tulafono, a o le 17 o Tesema e tusa ai ma le Lipoti lea e aumai, na aumai ai se faailoa mai le imeli mai le Peresetene ona o se workshop sa fai a latou, latou matauina ai nisi o mea e afaina ai le faatinoga o le galuega ona e le o fealofani le gagana, e pei ona i ai suiga e 11 ia, o le valu o na suiga o le faafealofani o le gagana. O isi suiga uma ia lea o lea o lo o aumai ai fautuaga a latou, ae pei ona ou fai atu, a tatou o loa e tuliloa le saunoaga a le Taitaifono, sa saili se tofa i le sami loloto. O ai? Faamulioatu. O le Loia Sili o lo o fautuaina le Malo, e tu mo le Malo, tu mo le Palemene ma Le Ao o le Malo, lea ua taoto mai i i lana fautuaga ona o lea e misi mai, masalo po ua pisi foi le Komiti lea e misi mai i le latou Lipoti. Na ou sailia mai le transcript o le fono lea, lea e e i i. Ia o lena.

Ona pau ane lea i le tofa na saili i lagi, ia o le mea faigata lea, aua o lea ua ou vaai atu, e ese la le tofa lea na saili i le sami loloto lea e aumai e Loia Sili ma latou uma, ese le tofa i le fautuaga ua aumai. Ona manatu lea, pe le o le tofa lea na saili e le Komiti i lagi. I lau foi sailiga, o le a le mea e tau o le tofa e saili i le lagi? Ona ou manatua ai lea o le faaiuga o le lotu o le Tutoatasi a Samoa, e ese le manaia o le lauga, tasi lea lauga manaia, e manatua ai pea e lou tagata vaivai le faamanatuina o le 60 tausaga. Lea i le faaiuga lava o le lauga a le faafeagaiga a le Afioga i le Sao Faapito, Salevalasi ma Lotofaga na ia faapea mai ai, faamanatu mai upu a le Perofeta o Mika na ou sailia, lea e maua ana upu ia na faitau mai i le Mataupu e 6 fuaiupu e 8, “sole, e amata i le sole, fai mai, ia fai le amiotonu, ia naunau i le alofa, ma ia feoai ma lou Atua ma le lotu maualalo”. O i la na ou manatu ai, o le mea la lea e tau o le tofa i lagi.

Afioga Hon Fiamē Naomi Mataafa: Lau Afioga i le Fofoga Fetalai...

FOFOGA FETALAI: Ia se i fai mai sau malologa, se i tulai mai le Afioga i le Palemia leaga o lea na e taua lona suafa.

Susuga MAULOLO TAVITA AMOSA: Se o lea ua uma lota taimi a o lena foi... Ia soia ia.

Afioga Hon Fiamē Naomi Mataafa: Faafetai tele ua faailoa le faifeau a lenei nuu, ae tau lava ina ia tuuina i faamaumauga, o le faagasologa o le taitaiga o sauniga o le Tutoatasi, ua oo i le EFKS. O le Susuga ia Iosefa Uilelea, o le Taitaifono o le EFKS, ma o le auala lea o le filifilia e faia le tatou faigalotu.

Susuga MAULOLO TAVITA AMOSA: Ia faafetai, e toe faaopoopo. Na ala foi ona ou taua le tulaga lea o le manaia o le lauga, o le upu moni lava....

FOFOGA FETALAI: Ia o lea ua manino le sui usufono mamalu. Ia faamaea mai loa lau saunoaga.

Susuga MAULOLO TAVITA AMOSA: A o le tele ia fai mai, o le folau ma le faatuatua i le Atua.

FOFOGA FETALAI: Faafetai.

Susuga MAULOLO TAVITA AMOSA: Ae toe faauma mai lava i le mea lea, faamanatu mai. O lea ua alu lenei taeao o finau sui usufono po o fea le Tusi Paia Sili. Fai mai isi o le Faavae, o le Palemene, o le Faavae, ae ou te fai atu, na pau lava lea o le Tusi Paia na tatou faatauto ai, lea. O lea la ou te ootoo atu ai mea ia. Ou te talitonu o le tofa lea mai le lagi, o le tofa lea mai le lagi o le amiotonu, lea e fai mai ai le tofa na saili i le sami loloto, o le fautuaga a le Loia Sili, toe aumai se lafo a le Palemene, faataatiaese le Vaega 113, ae toe aumai se isi lafo e toe tapena lelei ai ona aumai lea o faasaoga i luga o lena tulaga i le tofa mai lagi sa ou sailia, ou te faapea atu ai, ou te talia le Lipoti i isi vaega, vagana le vaega muamua o lo o faapea mai ai, e aveese, faaleaogaina. E faigatga ona faaleaogaina, e i ai foi le lipoti o le 80% o Samoa na fesiligia le teuteuga o le Faavae, latou te lagolagoina le teuteuga lea ua i ai nei. Ia o le soso atu lea, pau lava lea o sina upu e tasi lava faamolemole, o le tatou galuega e fai faatasi, e lagona lava le maniti o tino i nisi foi o mau ma saunoaga o lo o faapea mai, ave le Tulafono, soloa i le aufuefue. O upu a le atunuu, a soloa i le aufuefue seaiga fai mai, aveese tala i lalo fale, sosolo i ai le fuefue, e ufitia le tulga fale. O lona uiga, e tapu

ona toe foi i le nuu. O le faiga lea tatou te faia ai public servants? Ia manuia lo tatou aso.

FOFOGA FETALAI: Ia, o lea ua maua lou finagalo. E talitonu foi o lea ua uma ona...

Tofa Lenatai Victor Faafoi Tamapua (Vaimauga 2): Lau Afioga i le Fofoga Fetalai...

Afioga Aliimalemanu Alofa Tuuau (Sui o Tamaitai Alataua Sisifo): Lau Afioga i le Fofoga Fetalai, o sina avanoa lava o le matou itupa.

FOFOGA FETALAI: Ia, o lea ua usitai foi le Nofoa i le saunoaga a lo outou Taitai, aua o lea e i ai le tou Taitai i totonu o le Maota. Ia, ae... O le...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai leaga o la e faafofoga mai le atunuu faapea ai ua sui se Taitai o lenei Itu ma lenei Vaega. E leai o au o le Sui Taitai.

FOFOGA FETALAI: Ia, leaga e aloaia lava lau Afioga o lea e te i totonu o le Maota, o le taimi lenei o lea ua e saunoa. Ae manatu, ia, o lea e fia i ai se 2 o lea Itu atonu e i ai se taimi ona toe vaavaai atu lea leaga o lea na saunoa le Palemia, e i ai foi le toalua o lea Itu tai 5 minute, ia ma tau vaavaai atu ai le tatou taimi.

Ia, o le avanoa lea o le Itu lea na talosaga mai ai le Palemia. Ia, lau Afioga i le sui usufono mamalu mai Falealupo.

Afioga FUIONO TENINA CRICHTON (Falealupo): Faafetai. Faafetai lava i lau Afioga i le Fofoga Fetalai aua foi sina avanoa e fesoasoani foi i le tatou mataupu i le afio o le Afioga i le Tamaitai Palemia, aemaise foi o le afifio o le Kapeneta. Le la foi Itu o lo o susu ai le Taitai o le Itu Agai, aemaise foi o sui usufono mamalu aua le Palemene o le tatou atunuu.

O le sisiina o le tatou Fua ua maea atu nei, o se aso uiga ese lea. Pei faatoa toe sisi le fua, faatoa amata ona sisi le Fua i le 1962 i le matagofie o le faatinoga o galuega. O au ia, na savali atu loa Fiamē o le a sisi le Fua, na matua maligi ou loimata ma ou vaai atu i ai i lou alofa i lenei Tamaitai Palemia, a o lenei lava e fetogia lava i totonu o le Maota ona o tulaga faausugafono. Ae viia le Alii o mea lelei o lenei aso. Faafetai foi pei ona saunoa se tasi o sui usufono, aua foi le faifeau sa taitaia. O le matagofie ia o ia mea lelei tatou faalogologo i ai i lona manaia ma lona faatauaina.

O lenei foi vaega o le tatou aso, e taumafai atu ai se lagona o lenei foi itumalo mai Falealupo aua le Lipoti a le Komiti. Faafetai tele i lau Afioga i le Taitaifono o le Komiti, e ui lava o lo o e gasegase, o lo o avea oe o le mau

i le mulivae pisia aua lou faataotolia. Ia leai o lenei lava ua aumai oe i luma o lenei aso, se i silasila atu le Palemene ia ma tulaga o i ai. Ae talitonu foi o le alofa o le Atua e ia te Ia lava. Afai lava o lea e umi ou aso, ia e leai e fai lava le finagalo o le Alii. Ae afai foi e puupuu, e fai lava le finagalo o le Alii. O mea ia tatou te vaavaai i ai i le tagata aoga ma le galuega o lo o fai. Malo faafetai.

O le Lipoti a le Komiti, o le manino ia aemaise lava o nei Tulafono o lo o taumafai nei ua afaina ai tulaga o Faamasinoga, ona o tulaga na savalia aua foi le Komiti Faapitoa a le Palemene i lea foi vaitau. Ia leaga o lenei lava nuu ia o Falealupo, na matua teena lava nei mea uma, e le i faapea lava na sese, leaga o Fuiono lava lenei e tautala na faia le upu a le nuu a o feagai ma le Komiti. I le tilotilo la i ai, o lea la ua fua mai mea nei, ua oo lava i le Afioga i le Peresetene ua afaina talu lava faaiuga nei ua faatino. I le lagona la ma le vaavaai, ia e i ai ea se tatou mea e taumafai e toe foia ma faalelei? Ia e leai o lo outou paia ma lo outou mamalu e tilotilo i ai i mea taua mo lo tatou Malo. Aua e le tau fai atu na aafia foi le Afioga i le Peresetene...

Tofa Lenatai Victor Fafoi Tamapua: Lau Afioga i le Fofoga Fetalai...

FOFOGA FETALAI: Ia malie le sui usufono mamalu se i tuu atu le avanoa i le sui usufono mo Vaimauga 2. Se i tulai mai lau Afioga.

Tofa Lenatai Victor Fafoi Tamapua: Faafeai i lau Afioga mo le avanoa. Ia atonu o le vaega tonu lea ua oo i ai le saunoaga a le sui usufono, o se vaega lea e fia avatu ai foi se vaega e fia faamalamalama. E pei ona taua e le sui usufono le tulaga lea sa oo atu le Komiti ma tulai foi le latou afioaga e tetee, e sao lelei lau Afioga. E faapena ona taamilo le Komiti, sa ave i ai le faautaga e saili mai le finagalo o le atunuu. A o faamaumauga ina ua maea le sailiga, e lata i le 90% sa faapena ona lagolagoina tatou Tulafono ia. E pei o le popolega lenei, pe a faapea e faasolomuli i tua Tulafono ia e 2, ona o le atunuu lea sa latou lagolagoina. Ma le faaaloalo lava.

Afioga FUIONO TENINA CRICHTON: Leai e le o faasolomulia.

FOFOGA FETALAI: Ia malie le sui usufono mamalu, atonu o la e talanoa lava le sui usufono latou i le latou itumalo, e le o aafia ai itumalo uma o le atunuu.

Afioga FUIONO TENINA CRICHTON: Faafetai. E le o le agaga ona o le itu lenei.

FOFOGA FETALAI: E sao le... na o le tou itumalo lea e te talanoa mai ai?

Afioga FUIONO TENINA CRICHTON: Leai. O lea foi ua uma ona o la e ua aumai fua le mea lautele ia a o mea a Falealupo lea na fai lea e avatu e Fuiono. Ae aua le aumaia fua le mea lautele ia. O lena na iloa na ioe uma i le Tulafono ia ona o tulaga faapena, a o lea ua leai lava se isi o na tagata na ioe o toe fiafia i ai i le Tulafono. O lea ua sao ai lava Falealupo i lana mau na fai.

FOFOGA FETALAI: Ia faamaea maia lau saunoaga.

Afioga FUIONO TENINA CRICHTON: Ia, leaga ne i te i foi ua uma se leo o Fuiono, ua vave foi le tatou taimi. E matua lagolagoina e Falealupo le Lipoti a le Taitaifono ma le Komiti. Ia manuia le tatou aso.

FOFOGA FETALAI: Malo faafetai. Ia se i tulai mai lau Afioga i le Tamaitai Palemia.

Afioga Hon Fiaame Naomi Mataafa: Lau Afioga i le Fofoga Fetalai, ae le i toe tulai mai le sui usufono lona lua a lenei Vaega, ou te talosaga atu i le Maota i Itu e lua, o tatou o sui usufono, e i ai lava le Tulafono Faavae, a pasia loa le Tulafono, o le Tulafono lena. E manino, e silafia lelei e le faigamalo, ua taoto tatou Tulafono nei. O lea tatou te talanoa i suiga ma aafiaga o suiga. Na o se mea lava lena e fia faamalamalama. Na laga mai e nisi o sui usufono faapea o se mataupu sa tauave e lenei Vaega Faaupufai i lana anava, ioe. Ma atonu i se vaaiga lautele tatou oo atu i ai. Ae mo lenei galuega lau Afioga i le Fofoga Fetalai, tata mai outou finagalo i le mataupu sa feagai ma le tatou Komiti. Faafetai.

FOFOGA FETALAI: Ia, ou te iloa o lea ua manino le tulaga lea pei ona taumafai atu ai le Taitai o le Malo. Ia, e matau atu o lea ua... Leaga o la e ua muamua mai le sui usufono mo Faasaleleaga 2.

Ia, tulai mai lau Afioga i le sui usufono mo Faasaleleaga 2.

Afioga MAGELE SEKATI FIAUI (Faasaleleaga 2): Faafetai i lau Afioga i le Fofoga Fetalai mo le avanoa. E puupuu lava foi, o tama o le Mataaevave e faimea pupuu lava. Ia e naunau foi i le ufi, ae fefe lava e manumanu i le tatou taimi, o lea foi e matau ua tulai mai foi le Afioga i le Tamaitai Palemia, aemaise foi o lea e le i tali le Taitaifono.

Ia, tulou le paia o Tiafau nei, e manatu foi o paia o Samoa o le a le toe oo lava i ai. E tele lava nai vaega anoa o lea sa fia tautala i ai Faasaleleaga e tusa ai ma le Lipoti, ae paga lea, e tasi lava le mea o le a ou oo i ai.

Lau Afioga i le Fofoga Fetalai, o le Tulafono lenei na sii ai lou lima e fia tauva i le palota, lea foi e alaala ma afifio mai sui o le Komiti sa faatalanoaina

le Tulafono lenei, na ou oo mai lava i i le Maota o Tofilau ma faailoa i ai tulaga sa ou teena ai le Tulafono.

O le a ou le toe oo la i ai, ae o le a agai e tusa ai ma tulaga o le Lipoti a le Komiti. O le tasi lava lea o vaega ou te fia oo i ai e tusa ai ma lau tapenaga ma faailoa foi nisi o faanoanoaga o nisi o sui usufono. Ou te tulai foi e faailoa lou faanoanoaga i tulaga ua aliae ma ua tulai mai e tusa ai ma le Lipoti a le Komiti.

Muamua lau Afioga, e mafaufau lava lenei sui usufono i le tulaga mamalu o le Palemene, le integrity o le Palemene lenei i gaoioiga ma vaega e fai i fafo atu o le Palemene lenei faatatau i Tulafono ua uma ona pasia atu e le Maota.

Lau Afioga i le Fofoga Fetalai, o le vaega lona lua e fia avatu ai se manatu ma se tuualalo e tusa ai o le Lipoti lenei, manatu i le taunuuga, manatu i le taunuuga. O le a le taunuuga i suiga nei e fai? Essence of this changes o le intention ma tulaga faapena. O i e tau taliu ae popoe ai se taofi o lenei usugafono. Lau Afioga i le Fofoga Fetalai, aua ne i faamalieina le tagata e toatasi, ae silasila i le atunuu, silasila i le atunuu. O tulaga... o le vaega lea ua faaopopo i ai le fuaiupu lea ua sua lea e faapea mai, seia vagana se faatagaga mai le Peresetene, e popoe lava i ai le taofi lau Afioga i le Fofoga Fetalai. E popoe lava i ai le taofi i le tulaga lea. Leaga o le Faamasinoga o Fanua ma Suafa, lea e le toe po malae, o le pepe lea a lo tatou atunuu tatou te faapelepele i ai. Aisea? Leaga o measina a lo tatou atunuu. Ae faapena se vaivaiga, o le lagona lena o lenei sui usufono, ina ia tatou manatu ma mafaufau, silasila mamao i le taunuuga ma le ooooga e oo i ai lo tatou atunuu ona o suiga nei, suiga nei.

Na pau lea o se vaega e fia faailoa atu lau Afioga i le Fofoga Fetalai. O le a taatia nisi tulaga, ae i ai lou talitonuga, o lo tatou saolotoga moni, o lo taoto i lalo o le tatou usitaia o Tulafono. Ia, o le tulaga lea lau Afioga i le Fofoga Fetalai, a manatu i le tulaga ua aumai e le Komiti, ona ou faapea lea, ua faamaonia le eseesega o kopi e 4 ma nisi vaega o lea ua maua o lea ua faamaonia i suesuega a le Komiti.

Ona ou manatu lea e tusa ai ma lenei Tulafono i lau vavaai ma lou lava ia sui usufono, e le i atoa lio o le masina le tapenaga e tusa ai ma tapenaga o lenei Tulafono. O le mea lea ou te lagolagoina ai le Lipoti a le Komiti, ina ia faasee i tua, faasee i tua aua ne i faaaogaina le upu lea o le faasolomuli leaga o lea e atugalu ai nisi...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: Malie le sui usufono mamalu se i tuu atu le avanoa i le sui usufono o Vaimauga 1.

Afioga Sulamanaia Fetaiai Tauilili Tuivasa: E le mama i le sui usufono o le Vaimauga 1 le saunoaga lea a le sui usufono e le o atoatoa le Tulafono. O lea na malele nei lava le Afioga i le Tamaitai Palemia ua pasia le Tulafono lea. E pei e tuumamaina e le sui usufono lea le Tulafono, talanoa pea i le Lipoti a le Komiti, a o le Tulafono lea tatou te talanoa ai, na pasia i le Paeaiga ua tuanai i le 2/3 o le Palemene lenei. E pei o le mea lena o lea e tau tuutuu atu ai lava le talosaga, a o lea e talanoa lava le sui usufono, lea fai mai e mama, ae le i mama ia matou sa i ai le Tulafono lenei, na pasia lava. Na pasia i le 2/3 o le Palemene lenei.

FOFOGA FETALAI: O lea ua maua atu. O lea ua maua lou finagalo. Se i saunoa mai lau Afioga i le Palemia.

Afioga Hon Fiamē Naomi Mataafa: Lau Afioga i le Fofoga Fetalai, ua ou matauina pei e fia Sui Fofoga Fetalai le sui usufono lea o Vaimauga 1. Malie ia lou finagalo, o lena na faaali outou finagalo. O le le atoatoa lea e fai mai ai le sui usufono lea lau Afioga, o le order. A e faitau i le Lipoti, o la e na fai le molimau a le Law Reform, i, e sao e le i atoatoa, o la e i ai le Tulafono la e le i tapenaina pe le i faia e filifili ai Faamasino. O le le ato lena. Faitau lelei lau Lipoti.

FOFOGA FETALAI: Ia, ou te iloa o lea ua manino lea vaega lau Afioga i le sui usufono mo Vaimauga 1. Onosai mai se i fai atu lau tala. Se tatou te nonofo ma toso i tua tatou saunoaga. O le agaga lava ia o le saunoaga a le sui usufono mamalu, o lo o alu agai i se agaga o le Lipoti, o se vaega o le Lipoti. Pei o le itu lena ae le o faapea mai o le Tulafono pei ona e tau maua mai.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai leaga o lea na malele le Afioga i le Tamaitai Palemia, o lea ou te talanoa atu i Tulafono Tumau 82 lea e maua ai lou avanoa. A outou faalogo lelei lava pe aumai foi faamaumauga ia, na saunoa lava le sui usufono lea o le Tulafono e le o atoatoa. O le ala la lea na ou tulai atu ai, e le o talanoa mai o le Lipoti, o lea e talanoa mai i le Tulafono lea na pasia. Ma lou faaaloalo. Ae o lou tulai atu o le Vaega 82 o le Tulafono Tumau lea e maua ai lou avanoa.

FOFOGA FETALAI: Ua lelei, o lea ua maua. A e lailoa e tau tau mai lena vaega, o lea e malamalama i ai le Fofoga Fetalai. Faaauau mai lau saunoaga Magele?

Afioga MAGELE SEKATI FIAUI: Faafetai i lau Afioga i le Fofoga Fetalai. E leai, e tumau lava le faamamalu ma le aloaia o tulaga ma Tulafono

ua pasia e le Maota. Pau lava lea o le vaega sa tau agai i ai se lagona, ona o suiga ua toe fai ma tulaga e pei ona atagia ai le Lipoti a le Komiti. A ua uma foi se manatu lau Afioga i le Fofoga Fetalai, pau lava lena o le vaega sa fia molimoli atu ina ia tatou seu le manu ae tagai i le galu, ina ia tatou mafaufau. Aua o le taua foi lea o le aafia ai o le Faavae i le tapenaga o lena lava Tulafono, e manaomia le umi o le taimi tatou te vailiili ma sailiili ai tulaga uma ina ia aua ne i aafia ai si o tatou atunuu lautele.

Ia o le manatu lea ma le agaga faaaloalo i lau Afioga i le Fofoga Fetalai, faafetai tele mo le avanoa. Faafetai mo lou itumalo i le tapenaga o le Fua i le Aso Lulu.

FOFOGA FETALAI: Malo faafetai, o le mea sili o lea ua maea mai le saunoaga a le sui usufono. Ou te faamalulu atu foi i le tatou Maota, aemaise foi o lea lava na maua atu i luga nei... E talitonu foi tatou te galulue faatasi, o lea foi ua saunoa le Sui Taitai o lena Itu o lea foi ua saunoa le Palemia, ia o lea ua uma tatou sui usufono taitoalua.

O le mea lea e faamalulu atu ou te talitonu lava o le agaga e tasi lea o outou finagalo lea ua taatia i le Maota. Ae i ai le manatu, leaga o lea ua tatou agai atu i le tatou taimi manava, ia e pei o le agaga lena o lea o le a tuu atu ai le avanoa i le Taitaifono, ia ona tuu atu lea i le tatou Malo mo se tatou lafo, atonu e faamalieina uma ai lava outou finagalo. Ia ma le agaga faaaloalo. Lau Afioga i le Taitaifono.

Afioga AUUPAAU MULIPOLA ALOITAFUA MULIPOLA: E momoli le faafetai i lau Afioga i le Fofoga Fetalai mo le avanoa ua tuuina mai. Talu ai o le manumanu i lo tatou taimi, o le mea lea, se i tau lava ona ou autalu, tulou le gagana, le tele o finagalo na faaalua i le Lipoti lena.

E 15 sui usufono na sausaunoa o le Maota e uiga i le Lipoti i o latou finagalo na faaalua. Ou te fia afea le sui usufono muamua le susuga i le Sui Taitai o le Itu Agai ona o le saunoaga matagofie e uiga i le faaiuga ma le fautuaga a le Komiti e faapea, ina ia faasolomuli Tulafono nei e 2. O le lona lua o le fesiligia, a o le a se vaifofo o le faasolomuli?

Ia, faafetai i le finagalo na faaalua. O le uiga lea o le faasolomuli, a o le uiga foi lea o le vave faamatuuese mai, e ese mai la i le uiga foi lea i le faa-Peretania o le repeal o le Tulafono. Pau lava le agaga na tuuina atu ai le fautuaga, ina tau lava ina ia tuutasi mai le Tulafono i tua ona tatou toe tapena lea aua e le natia, e le i uia e le Ofisa o le Fono auala faaletulafono ma auala faale-Tulafono Tumau e pasia ai le Tulafono. E le i uia le auala 111 o le Tulafono Tumau, 112 ma le 113. Ua maea foi lona taimi faatulafonoina ina ia tapena ai ni sese faale-ofisa ma faale-lomiga. Afai la ua maea foi le taimi faatulafonoina, o le fesili la, o ai le malosiaga e mafai ai ona toe tapena le faasaoina o le mea lea? pe afai ua le galuaeina e le Ofisa o le Fono ma le na vaai le Ofisa o le Fono, a o la e maua le avanoa? O le mafuaaga foi lea na

ou taua ai le faaupuga lea ina ua laga e se tasi o sui usufono mamalu, e le saosao uma ni tagata, e i ai foi le taimi e sese ai. O le mafuaaga lea o le faaupuga, ae le i fai atu le faaupuga ona e faapea o se sese o le Komiti i le faatinoina o le Lipoti. O le uiga lea o le faaupuga lea sa ou taua, leaga o lea sa laga e se isi o sui usufono mamalu o le Maota lenei. A i ai ni sese, e mafua mai ona o le faatinoina o le galuega i galuega tau lomiga ma faiga faale-Ofisa, o le avanoa la lea o le 111. A o le fesili, o ai e faatinoina? E faatino e se nauna lautele po o se toatele? E tasi lava le tagata e i ai le malosiaga, ua na o le Fono Aoao Faitulafono i le o lo o vaaia le Ofisa, le Failautusi o le Fono.

O le fesiligia po o le a se fofo o le faasolomuli mai, e le tau ina tu i le taofi le finagalo o le Komiti, tulou le gagana pe na o le se'i o le taofilima pei o le taavale ona tu ai lea. Leai. Se i faatafe lava ma toe faafoi lava le vai i le mea na tafe mai ai. O ai na te faia le faasaoga lea e pei o le tele o finagalo? Le Executive lea, le Afioga i le Palemia, le mamalu lea saotualua o Minisita Lagolago, le Itu Agai lea ua tauave nei e le Sui Taitai ma le mamalu o... i latou ia e faia le suiga. E aunoa e aunoa lava ma se isi malosiaga mai fafo. O le uiga lea, e le tau ina faasolomuli mai, a o le vaifofo, se i toe faatafe mai lava le vai i le mea na alu atu ai. O le malosiaga lea, aua o i e ofi mai ai tatou Tulafono Tau Faaofi e avea ma Tulafono e pasi e le Palemene.

Ia, o le tali atu lea e tusa ai o le lafoga a le Sui Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai o le mea e fia faasao.

FOFOGA FETALAI: Ia se i onosai mai lau Afioga i le Taitaifono se i tuu atu leaga o la e taua le Afioga i le Sui Taitai o le Itu Agai.

Tofa Hon Lauofo Fonotoe Nuafesili Pierre Lauofo: O la e tau sosolo mai lava i luga o le laina saunoaga a le Taitaifono, ae le o le mea tonu lea na ou talanoa atu ai, ou te le i fai atu e talia le faasolomuli. A lea sa manino lava lau folasaga, o le upu faasolomuli o se upu e fou i lau faalogo i totonu o le Maota lenei pe a talanoa Tulafono. Ma o lea foi sa ou fai atu, e leai lava ma se upu faasolomuli o i totonu o le Tulafono Tumau e mafua ai ona ou fesiligia pe faapefea ona faatino lea mea o le faasolomuli o le Tulafono. E faapefea ona faatino? A o ai e faatinoina?

Lua o au mataupu sa ou avatu, o le a la le fofo? o lea ua aumai le faafitauli. A lea sa ou faamalamalama manino atu lava, o le faiga e fai ai Tulafono, e le faasolomulia, e aumai le isi Tulafono i totonu e soloia ai le Tulafono lea ua taua faapea ua faaletonu.

FOFOGA FETALAI: Ia, faafetai, o lea ua maua lou finagalo.

Tofa Hon Lauofo Fonotoe Nuafesili Pierre Lauofo: Ia po o se Tulafono Tau Faaofi e teuteu ai le Tulafono. O ala masani na o lea e i totonu o Tulafono Tumau i le faiga o galuega a le Palemene, ae leai ni mea faasolomuli i tua. Faafetai.

FOFOGA FETALAI: Malie, o lea ua maua lou finagalo. Atonu o lea ua maua mai e lau Afioga i le Taitaifono, o le agaga lena pe afai e ese foi se faaupuga o lou finagalo, ae atonu o le auga lava ia taatia i lona taatiaga e tatau ona taatia ai.

Afioga AUUAPAAU MULIPOLA ALOITAFUA MULIPOLA: Faafetai.

FOFOGA FETALAI: Se i onosai mai lava lau Afioga i le Taitaifono, se i tulai mai lava lau Afioga i le Tamaitai Palemia.

LAFO MO LE FAAAUAUINA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, ona ua matauina i le tatou uati ua latalata atu i le tatou taimi manava, o lea ou te fia faatu se lafo pe a tusa ai ma lou finagalo, *Ina ia faaauau le tatou galuega seia maea, ona o lea ua oo i le tatou taimi manava.*

E pei o le lafo lena.

Faaluaina e le Sui Palemia ma le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Ia lea ua talia le lafo, faaauau le saunoaga.

Afioga AUUAPAAU MULIPOLA ALOITAFUA MULIPOLA: Faafetai i le Afioga i le Sui Taitai, ma ou te le toe afea le itu lea.

O le sui usufono lona lua, o le sui usufono o Faasaleleaga 5, ae paga lea e le o afio mai le sui usufono mamalu. Sa ia taua ai ua na o ni suiga faatauvaa. Ia o lena ua maea ona fola atu i luma e le Komiti lana Lipoti. E eseese mamao o sese tau lomiga ma ni suiga ogaoga ua i ai.

Lua o le saunoaga a le sui usufono, e faatatau mai ia te au lava ia na o au lava ia sa le tatau ona ou Taitaifono i le Komiti. Ia, e faamalulu atu i le sui usufono, leai, ou te le tufiina le popo e pau po tulou le gagana ne i te i ua ou tufi atu ai ma nisi agaga leaga foi ia faasalavei. Pau lava lea o le tulituli e faamalie le lafo. O le mea lea, e faamalie atu ai i le sui usufono pe a... ma

ou te le taea foi ni taetafe o le gataifale, tulou, pau lava lea o le faamalieina o le Maota lenei ma aiaiga na tuu mai ma galuega.

O Vaisigano 1, ia, ua lagolagoina le Lipoti a le Komiti. O Vaimauga 1 ia Sulamanaia, ia e faafetai. Faafetai i lou finagalo ma lau tau matau mai. Na pau lava o lea, leaga o lea na maua i le saunoaga faapea ua tau advance laitiiti le Lipoti. E leai, o lea lava matou te taotao lava i apefoe foi lea o taiala ma terms of reference na fai ai le matou galuega. Afai foi o le silafia, ia, atonu e leai lava se afaina o lou finagalo. O le mea lea, ia o le tali atu lea i le sui usufono. O lea lava matou te taotao i apefoe i le mea sa aumai ai taiala matou te faatinoina ai le galuega.

Ia, o le isi mau na aumai e le sui usufono faapea ina ia aumai i luma molimau na sutesueina i ni a latou... po o public informations foi lea. Ia e fiafia le matou Komiti o lo o faamauiina uma lava le tele o matou molimau, e i ai se taimi e finagalo ai le sui usufono e afio atu ia ona avatu lea i ai o le tele o faamaumauga. Ae faafetai mo le finagalo na faaalua.

O le finagalo na faaalua e le sui usufono mai Safata 1...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, leaga o lea ua taua lenei itumalo sa ta faapea o se aotelega.

FOFOGA FETALAI: Ia onosai mai le Taitaifono se i saunoa mai...

Afioga Sulamanaia Fetaiai Tauilili Tuivasa: A silasila foi lau Afioga i le Fofoga Fetalai i lenei taeao ua usitaia lava e lenei Itu ni saunoaga sa fia saunoa ai nisi sui usufono. E i ai la le manatu sa faapea e aumai i se aotelega se finagalo o le Taitaifono, a o lea ua aumai taitasi. Ia o lea la ou te tulai atu ai leaga o lea ua e fesiligia lou manatu. O le uiga o le advance lea na ou taua, advance le le malamalama i le mea sa tuuina atu ai taiala e tou te o ai. Ua ese le mea na tuu atu ai taiala ese le mea tou te o fai.

O lona lua o le mea lea na ou taua i le le malupuipua o faamaumauga, a silasila i le Lipoti lea, sa faatino a outou talatalanoaga i o i le Ofisa o le Fono. E malupuipua faamaumauga ma mea na e i ai i totonu. A o le a le mea lea? o le a le mea lea ua aumai? Ua aumai uma lava tala sa saunoa ai e sa i ai i totonu. O le popolega lena o lou sui usufono ina ia malupuipua a tatou faamaumauga ina ia mafai... a o lea ua alu atu i tua i le atunuu. Ae ou te le i fai atu e fia o e vaai. O lona uiga o le malupuipua o faamaumauga ma faatalatalanoaga a le Palemene lenei, le Komiti Faapitoa i le mea sa tatau ona i ai, ae le o le aumai faalauiloa, o ai na saunoa mai, o ai na saunoa mai. E i ai le Lipoti lea i le taeao ua alu i le atunuu. E mafai ona tali mai le tagata lea e tuuaia? E leai lau Afioga i le Fofoga Fealai. O le mea lena e fia faasao.

FOFOGA FETALAI: Ia, mo le faasaoina o lau Afioga i le Taitaifono, se i tulai mai le...

Susuga Maulolo Tavita Amosa: Ia e puupuu lava lau Afioga, faafetai o lea ua...

FOFOGA FETALAI: E le i oo i le taliga o lou tulai mai.

Susuga Maulolo Tavita Amosa: Leai, na o le avatu o se tuualalo pe le i matuia tele lea saunoaga ona e le o i i le sui usufono o Faasaleleaga, ou te le taliaina ni taetafe o le gataifale, o la e faafofoga Samoa. A tau taetafe, o lena e silafia, o mea lelei ma mea manogi ma mea faale-lelei e sau uma lava i le taetafe. Faamolemole pe mafai ona sui le upu lea, leaga o le Maota lena o le tatou atunuu. Ma le faaaloalo lava.

FOFOGA FETALAI: Ia, ua maua atu le finagalo o le sui usufono. Saunoa lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Faafetai. O le sui usufono o Vaimauga 1 sa saunoa, ia e faamalulu atu, leaga e ova ma le 14 aso lea na table ai le tatou Lipoti, ia ua public foi la informations, a o le saunoaga e foliga mai e le o malu faamaumauga a le Ofisa o le Fono. Leai o la e malu. O le mea lea e faamalulu atu ai i le sui usufono, e faataatia loa i le Laulau-a-Fono, pe a ma le 3 vaiaso lea, ia ua public informations ua o i fafo i le atunuu, faamalulu atu ai i le finagalo.

O le sui usufono o Safata 1 sa saunoa mai, e faapea mai i imeli, o le agaga o imeli e le i i ai se agaga e tasui, ia o lena ua taoto atu, ua taoto atu lava fetusiaiga i imeli mai lea aso ma lea aso e fai i ai la outou faatatau. O le mea lea, ia e faamalulu atu. E ui lava ina faapea e le o taua le upu lea tasui, a o le context lena o imeli, a lea ua taunuu. O le tasuiga lea ua mafua ai ona 4 kopi eseese. Ia, o le tali atu lena e tusa ai le finagalo faaalua.

Afioga Leana Ronnie Posini: Lau Afioga i le Fofoga Fetalai, ia o lea ua ou faalogo atu i le saunoaga a le Taitaifono...

FOFOGA FETALAI: Ia, se i tulai mai lau Afioga i le sui usufono mamalu.

Afioga Leana Ronnie Posini: O le mea lea o le tamilo o upu. Tatou talanoa sao i mea la e i totonu o imeli, a o lea ua fai mai e sao e leai ni upu faapea e sui le Teuteuga o le Tulafono. O lena e manino foi lau tala na fai atu, a o lea ua e fai mai o le aano o le imeli o le sui. Se aua tatou te milomiloa tala ma tasui tala, aumai sao mea na e i totonu o faamaumauga. Ma le agaga faaaloalo.

FOFOGA FETALAI: Ia, tulai mai lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Faafetai. Ia o lea lava e mau i i saunoaga a le sui usufono. Atonu o la e foi e manino le sui usufono, e le o le aano a o le taunuuga la o le teena o le Lipoti a le Komiti. Ae faafetai mo lou finagalo faaalia, o lea lava e mau i i faamaumauga. O nisi foi sui usufono na manino i kopi nei e 4 ma fautua mai se i toe teuteu ni mea ua sese na pasia e le Maota.

O le anoliu lea na oo i ai suesuega a le maota. E tele lava nisi finagalo o le Maota lenei na faaalia, po o le a le mea na le faaaoga ai le kopi na saina e Le Ao o le Malo i le aso 5, ona toe fai lea i ai o nisi faiga. E manatu le Komiti, ailoga o le sao lea o le process. A o le fesili foi la a le Komiti, na faapei i le Tulafono na pasi e le Maota lenei ma le Palemene ma le Tulafono la lea na saina i le aso 5? O i ai ni ona eseese. A lea sa momoli atu e le Komiti, o le tele ia o le eseese. Ma o le uluai kopi lea sa faatauina i le atunuu. O le tali la a le Komiti, faatauina e le atunuu kopi sese, kopi e le i pasia e le Palemene lenei. Ona toe oo lea i le aso 15 o Ianuari, se i toe avatu foi le isi imeli ma isi suiga toe tuu foi i luga e le Ofisa o le Fono i le website a le Palemene, tasi lena kopi sese lua kopi. Ona toe oo foi lea i le aso 4 o Fepuari toe fai isi suiga toe tuu foi i luga o le website a le Palemene, tasi lena kopi sese. Ia faatasi ai ma le kopi lea na ave o le Certificate of Amendment, e le o atoatoa.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

FOFOGA FETALAI: Ia, ou te le iloa po o...

Afioga AUUAPAAU MULIPOLA ALOITAFUA MULIPOLA: O nisi la o sui usufono sa finagalo po o fea...

FOFOGA FETALAI: Ia se i malie lava lau Afioga i le Taitaifono se i tuu atu la le avanoa i le... o le a le uiga o le faauilavea lau Afioga i le sui usufono mo Falelatai ma Samatau?

Afioga Lupematasila Galumalemana Tologata Togia Tile Leia: Leai na o se mea lava e fia faamalamalama, leaga o lea sa ou taua foi i lau lauga a o lea ua saunoa sao lava i ai le Afioga i le Taitaifono, fai mai ua le iloa po o le a le kopi e faaaoga. A o lea sa ou tau manino atu, o le a le kopi ua tuu i ai le maliiega a Le Ao o le Malo, o le kopi lena e tatau ona faaaoga, ae faaleaoga uma isi kopi na e sese ai le atunuu.

FOFOGA FETALAI: Ia o le mea lena o lea ua... Masalo a e maua mai le faasolosologa maiga o... Ia se i saunoa lau Afioga i le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai, ou te fia fesili atu lava ile Taitaifono, po o le mea o le mea lea e finagalo i ai le sui usufono o Falelatai ma Samatau, ave mea sese i le Le Ao o le Malo e fai mai ai.

FOFOGA FETALAI: Ia, masalo o le agaga lena o lea e tau fai atu ai...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, pei e fai si matuia o ia lafoga. Ia, o ai lava a fia ave ni mea sese i le Afioga i Le Ao Mamalu o le Malo e ta saina mai? E leai o mea o pili na ave, o le lape. Se o lea lava e pei e misi lava le tulaga, o mea o le faatamala o le Ofisa lea e mafua atu ai nei mau mea.

Ae o lau tuualalo i le Afioga i le Taitaifono, ae a pe a e saunoa mai i le tulaga aoatetele. O lea e tagatasi uma lava finagalo na faaalua, e tetee uma lava. Ae manaia pe ana e sau i le tulaga foi lele o le aotelega o finagalo, o lea foi ua saunoa le Afioga i le Palemia, o lea ua faatali le Afioga i le Palemia e fia tuuina mai le lafo.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai.

FOFOGA FETALAI: Ia, ou te iloa... ia se i fai atu pea se tala a le Nofoa. O lea lava e tau maua atu le sui usufono o Falelatai ma Samatau, o lea foi e faafogafoga mai le Taitaifono, o lea foi ua aumai le fautuaga a le Sui Taitai, ia o le agaga lena o lea lava e faasolosolo mai le saunoaga a le Taitaifono, atonu o lea e silasila le Taitaifono i se isi itu ina ia manino pea outou finagalo faaalua. Ae... e i ai se isi mea?

Afioga Lupematasila Galumalemana Tologata Togia Tile Leia: O si vailiu laitiiti lava lea lau Afioga i le Fofoga Fetalai...

FOFOGA FETALAI: Ia se i saunoa mai lau...

Afioga Hon Fiamē Naomi Mataafa: Lau Afioga i le Fofoga Fetalai, ou te manatu e tatau ona faataatia i le taatiaga sao le mea lea ua oo i ai le fetalaiaga i le vaega lea po o fea le mea na saina ai Le Ao o le Malo, o le Tulafono lena e tatau ona faaaoga.

Lau Afioga i le Fofoga Fetalai ma le mamalu o le Palemene, a outou maua le faataatiaga mai o le Lipoti i le mataupu lea, na ave muamua le Tulafono saina Le Ao o le Malo. E i ai suiga, le toe avea i Le Ao o le Malo, ae na o le aumai lava o le pepa lea na saina ai Le Ao o le Malo toe tuu i luga o le suiga lea na fai. Po ua maua mai e le sui usufono lea e saunoa mai? Faamaonia le mea lena, faamaonia e le Ofisa.

O lea la lau Afioga i le Fofoga Fetalai, e mafai ona faapea, e 2 mea na saina ai Le Ao o le Malo i le faiga na fai ai, na o le pau lava le mea lena e fia faasao lau Afioga, a o tatou talanoa i le vaiulu lea.

FOFOGA FETALAI: Ia ou te iloa ua manino le sui usufono mamalu, o lea ua faamanino atu e le Taitai o le Malo le mea o lea sa tupu, ma o le mafuaaga lena o nei sutesuega, ma o lo o manino foi i le Lipoti. O le mea lea, ia...

Afioga Lupematasila Galumalemana Tologata Togia Tile Leia: Lau Afioga leaga e suamalie faaniuati le saunoaga a le Afioga i le Minisita. Ae na ona faapea atu lava, e leai, leaga o le matafaioi lea a Galuefa ia Falelatai o le puipui o le Tama a Aiga, leaga e le faigofie faamatalaga ma lafoga ia ua aumai. O le mea lea sa taumafai atu...

Tofa Hon Olo Fiti Afoa Vaai: Lau Afioga i le Fofoga Fealai...

Afioga Lupematasila Galumalemana Tologata Togia Tile Leia: Ia mulimulitaia le ala o Tulafono na fai ai suiga...

Tofa Hon Olo Fiti Afoa Vaai: Lau Afioga, e le mafai e le sui usufono ona faauilavea mai lau faauilavea lau Afioga ma le agaga faaaloalo.

FOFOGA FETALAI: Ia, malie lou finagalo, a o le Minisita foi na agai i le Taitaifono e le i agai atu i lau Afioga i le sui usufono mamalu. O le mea lea, faamanino lelei le tatou mataupu i luma o le Palemene, o le saunoaga lava ia a le Minisita na faauilavea i le Taitaifono. O le mea lea, ou te talitonu ua manino ia mea uma, o lea foi ua faamalamalama e le Palemia. Faaauau le saunoaga a lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: E momoli le faafetai i le saunoaga malamalama a le sui usufono o Falelatai ma Samatau, ia o lea ua faamalamalama atu. O lea ua faamalamalama atu, o le kopi lava na saina e Le Ao o le Malo i le aso 5 e le sao. Ne i fesiligia po o fea le kopi sao, ia o lea ua faamalamalama atu. Ae malie le sui usufono o lea ua ou faamalamalama atua.

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

Afioga AUUAPAAU MULIPOLA ALOITAFUA MULIPOLA: Ona ou oo mai lea i nisi o finagalo na faaalua i le mataupu...

FOFOGA FETALAI: E le mafai ona toe solomuli le tatou mataupu i tua lau Afioga i le sui usufono mamalu. O lea ua uma foi ona faamalie atu ma tuu atu avanoa, o lea e agai i luma le tatou galuega ma ou te talitonu foi o lea lava e te tau finau mai i le pito lava lea ma le itu e tasi, o lea ua manino. Faaauau le saunoaga a lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Faafetai i lau Afioga i le Fofoga Fetalai.

Ia, ona ou oo mai lea i nisi finagalo na faaalua e faapea e toavalu le Komiti sa galulue. E leai e faamalulu atu, o le mafuaaga na ala ai ona tusi le toavalu, ona ua tuua le Malo e le Afioga i le sui usufono mo Vaisigano 2, a o lea ua suia foi e se tasi o lauia o le Komiti le fetalaiga ia Seuamuli.

Ia, e pei lava o le tele ma le aoatetele lava o finagalo na faaalua, ina ia mafai lava ona toe faaoga le lomiga na se i saina e Le Ao o le Malo. A o le tilotilo lava a le Komiti i ai i le mea lea, ma le tele lava o le anoliu o le tilotilo a le Komiti, o so o se suiga itiiti pe faaupu o se suiga tau le lomiga pe tau i le Ofisa ae le i pasia e le Maota ae sui ai loa le context o le Tulafono, e leai la, ua liliu loa i ina le tilotilo a le Komiti. O se suiga ogaoga. Faataitaiga, a faapea te i ua ta lava le upu na o le upu “e” ae tuu i ai le “le”, ia, e silafia e le Maota le aoga o le Gagana Samoa. O le le ia e singular e tasi lava le tagata. Ae a aveese loa la le konesale lea ae tuu i ai na o le e, ia ona manatu lea, e tele la tagata ia e aafia i le Tulafono. O le context lena na matuai tilotilo i ai le Komiti lena ma lona aafiaga. Ae ui o lea, faafetai i finagalo faaalua o lena aso. Ia ona manatu lea o se taimi lau Afioga...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa...

FOFOGA FETALAI: Semeamanu lava e le i faauma mai le saunoaga a lau Afioga i le Taitaifono, ina ia faasaoina, o lea foi e faafogafoga mai le itumalo, e le o Vaisigano 2, a o Gagaifomauga 2, le itumalo o le sui usufono ua tuumalo. E fia faasao le saunoaga lau Afioga i le Taitaifono.

Afioga AUUAPAAU MULIPOLA ALOITAFUA MULIPOLA: Ia, e faamalulu atu i le paia o le itumalo, o Gagaifomauga 2. Ia manuia la outou filifiliga, e manatu o lea e faataunuuina i le itula o lena aso.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa.

FOFOGA FETALAI: O se avanoa i gafea lea e faafesili mai ai le sui usufono?

Afioga Sulamanaia Fetaiai Tauiliili Tuivasa: O se mea e fia faamalamalama i le saunoaga a le Taitaifono leaga sa ou lauga ai i le tulaga lea lau Afioga i le Fofoga Fetalai na taua ai saina. E pei lava ona ou talanoa foi o le taua ia o se mataupu e te saina ai ma e ioe i ai, ua ave i ai...

FOFOGA FETALAI: O ai lea e saina? Se i fesili atu lava i le sui usufono, o ai lea e saina?

Afioga Sulamanaia Fetaiai Tauiliili Tuivasa: O e le i saina le Tulafono lea. O suafa o i latou, ta te musu e tau suafa.

FOFOGA FETALAI: Ua uma ona... O le faatonuga a le Nofoa lea na fai atu i le tulaga tonu lava lea, e le i taua e le Taitaifono. O le tala a le Nofoa, aua le taua le itu lea leaga e i ai se taimi e fai atu ai se tala a le Nofoa. Peitai, o le mafuaaga lena. E leai foi se faatagaga o le a e saunoa ai fua i lea tulaga. O le tulaga lava ia, o lea na ou vave lava ona ou piiama atu i lau saunoaga, taatia le auvaega lea e le i saina ona e i ai se taimi e fai atu ai se tala a le Nofoa, ae le i laga e le Taitaifono mo le silafia e lau Afioga i le sui usufono mamalu. O le sao lena o lau faaiuga lea na fai atu i e le i...

Afioga Sulamanaia Fetaiai Tauiliili Tuivasa: E usitaia tele e le sui usufono lena.

FOFOGA FETALAI: Faafetai.

Afioga Sulamanaia Fetaiai Tauiliili Tuivasa: Ae pei sa ou taua leaga o lea e aumai i totonu e le o atoa saina. E pei la e mamafa ma faatau e le sui usufono lena mea na le saina ai i latou nei ma e na saina lava le malamalama.

FOFOGA FETALAI: E le afaina. O lea ua maua.

Afioga Sulamanaia Fetaiai Tauiliili Tuivasa: E pei o le agaga lena sa ou...

FOFOGA FETALAI: E i ai foi tatou Tulafono Tumau o le vaega lena, ae ua ou manatu, e le o nonofo mai foi i laua ua le saina le Lipoti lena, e leai foi la se mea o le a ou faamalamalama atili atu ai lea tulaga, ona e le o nonofo mai laua. Ae ana faapea o nonofo mai laua, ia, ua fai atu se tala a le Nofoa i le tulaga lea e tusa ai o le Tulafono Tumau a le Maota.

O le mea lea lau Afioga i le Tamaitai Palemia, tulai mai.

Afioga Hon Fiamē Naomi Mataafa: Lau Afioga i le Fofoga Fetalai, ou te faanoanoa tele i le sui usufono lea, fai soo nei ituaiga lafoga le faaaloalo,

saini le malamalama. Lau Afioga, se i aveese mai upu ia mai le faamaumauga o le tatou talanoaga. O lea ua tuu mai le avanoa. Ua uma lau...

FOFOGA FETALAI: Ia ua lelei lau Afioga.

Afioga AUUPAAU MULIPOLA ALOITAFUA MULIPOLA: Faafetai i le sui usufono. Ia o le agaga tonu lava lena, e ava tele i le Nofoa e tusa o le faaaliga a le Fofoga Fetalai, o le a ou le afea ai le tulaga lea, ae sa laga e le sui usufono. O le ala lea, ae faamalulu atu i le sui usufono, ona o lou ava i le Nofoa e faatonutonusu le Fonousu a le atunuu. Ia ae pei o le lautetele na o nai tulaga na afea e finagalo o le Maota Fono nei e e uiga i le Lipoti na matou saunia.

Ae ou te le i nofo i lalo, malie lau Afioga i le Fofoga Fetalai i le maua ai o lou avanoa, na o sina upu e tasi e faafetaia ai le Komiti aemaise o le tapuaiga a le atunuu ma lou itumalo.

Lau Afioga i le Fofoga Fetalai, se i ou afe ane lava se i tau lava o sina upu faafetai i sui usufono mamalu o le Palemene lenei sa o matou galulue i lenei Komiti Suesue Faapitoa, e le natia i le talafaasolopito o lenei Palemene ua 60 nei tausaga talu ona faavae, o se taimi muamua lenei ua faavae ai se Komiti Suesue Faapitoa faapenei e ese lona natura ma ona taiala na faatinoina ai suesuega. Faamalo i lo outou lavapapale ma la outou galuega, e le faigofie le pale ma le folau, ae peitai ua le po malae i lenei Palemene, paga lava lea ua le atoa le saofaiga a sui usufono o i matou na amataina le Komiti lenei, ina ua ioioi le manulagi ma le maa na lele mai le atulagi mamala, ma ua le nofoia ai le nofoa o Tavita e se tasi o sui usufono na matou amataina. Talofa e ua maliliu toa ua maumau ai auupega o le taua ina ua tuua faafuasei le Malo e se tasi o toa manumanu o lenei Komiti, ae o se poutu o lenei Palemene ua mou atu lona suafa e le galo pea le Afioga i le Sui Minisita o Faatoaga ma Faiga Faiva. Alu ia oe ma le manuia, matou te tapena atu foi matou. Faamaise le Atua i le faletua ma le nofo a alo.

Lau Afioga i le Fofoga Fetalai, e fia faamau se faafetai i le tapuaiga mamalu ae mamala foi a le atunuu ua vaeseuga lo outou faatali mai i lenei mataupu, ae po o afea e sasaa ai le faiva tautai o lenei Komiti sa matauina ma taofiofia nisi o finagalo ma lagona na se i fola i le ala faatekonolosi ona o lenei lava mataupu, ma fesauai faalatana o vao i le vaopuanea finagalo eseese ma tau ai ina faavaivaia i matou. Aua fai mai le Tusi, “pe a ou vaivai, ona ou malosi ai lea”. O le upu moni, e le i faavaivaia au ma le Komiti Suesue i ni lagona eseese na faaaliga, ae ua fai lea ma mea e su ai o matou ivi, sulu i o matou vae ma le malamalama i o matou ala. Faafetai le tapuai. E taua ia i matou finagalo uma i la outou faasoa mai.

Le aufaigaluega tofofi a le Atua i so o se fatafaitaulaga ona o le talalelei ua ao ai Samoa, ua ao ia outou faalupega o le atunuu. Se ua malo fai tatalo, ua le ole lea. o la outou galuega le tuu taimia, e asamo lava pea i le Atua i le ao

ma le po, aua se Samoa saogalemu, a o se galuega fita e le taumuaalo lava i so o se faafitauli pe faaleaganuu, pe faale-talalelei. Faafetai le tapuai. Ia saga faatumu pea le suauu i le fagu ma le kate i le falaoa, ma ia tului e le Atua lo outou malosi i le tino, ae silisili i le agaga.

Lau Afioga i le Fofoga Fetalai o le Maota Fono nei ua ou fia pai i si ou itumalo e momoli lau faafetai i la outou tapuaiga. Aiga i le Tai, le Susuga Tutasi malo faafetai. O ai ea au nei ua filifilia ai e le Palemene i lenei tofiga maualuga e avea ma Taitaifono o le Komiti Faapitoa lenei? E momoli lau faafetai ia te outou, la outou tapuaiga ua ae ai i puna ae ifo i anaua, ae ua atagia ai le leai o se galutau se i fetai ai ma se galu foi.

So o se Samoa o lo o alaala i fafo o Samoa, faamalo lou Isaraelu o le susue o lou faamalama ma e tagai mai pea i le atunuu o lou faasinomaga ma faaaau mai le togi o lau maa i le tamaoaiga a le Alii. Le Alii e, o ai ea a matou sulu i ai ua e silafia lenei faamai ua oo mai i laufanua o Samoa? O le ola ma le malutia o Samoa o lo o i ou aao, se i e alofa mai malutia Samoa.

Le paia e o lenei Palemene, o le upu moni e masani le tautai matapalapala i le tai ma lona taaga, a o ni maa faafuagalua e iloa ai le vaeluaga o le tai, ae peitai, e le atoa lava le faitauga o i'a i le liu o lona sa. A i ai ni sasi, a paopapa foi se upu i lau faafofoga Samoa ma lenei Palemene, ma ono papatea ai lagona, o upu lava e fai i vai o Aana, a mai Mataiva ma Mataitai matua le tuu i Punaolo. Faamagalua mai au ma le Komiti. Faamanuia le Atua ma ia saga faamanuia pea le Atua Mamana i lenei Palemene ma le Malo o Samoa. Lau Afioga i Le Ao Mamalu o le Malo ma lau Masiofo, le Sui o le Fono a Sui Tofia ma lou faletua, Itu Fefaatauagai o le Faigamalo o Samoa.

Manuia lau Afioga i le Tamaitai Palemia ma lau Kapeneta filifilia, Sui Taitai o le Itu Agai, le sao toalua o Minisita Lagolago i le galuega, manuia lau Afioga i le Fofoga Fetalai ma lou sao toalua atu, faamanuia mai ia Samoa.

Le la e, ia tumau oe i Kipeona ma oe le masina ia tumau i luga o vanu o Airona. Ia manuia tele le 60 tausaga Samoa ua tatou faamanatu. Manuia le faiga filifilia a le itumalo o Gagaifomauga 2 o lo o faatino i lenei aso. Soifua ma ia manuia.

FOFOGA FETALAI: Malo faafetai i le saunoaga a lau Afioga i le Taitaifono. Ou te talitonu foi o lea ua manino nisi o mataupu sa laga e sui usufono mamalu. Ae manatu, o le avanoa lenei lau Afioga i le Tamaitai Palemia mo lau lafo.

Afioga Hon FIAME NAOMI MATAAFA: Faafetai i lau Afioga i le Fofoga Fetalai. Ua ou manatu ua faaiuiu le mataupu o lo o i le Laulau-a-Fono a le Palemene, o le Lipoti lenei a le Komiti Suesue Faapitoa a le Palemene e faatatau i le mataupu na laga e le Loia Sili e uiga i le Teuteuga o le Faavae 2020 ma le Tulafono o Fanua ma Suafa 2020.

Lau Afioga, e manatu e le tau faamatalaina le uiga ma le autu o lenei galuega, o lea foi ua taatia le Lipoti, ma e momoli atu le faamalo ma le faafetai i le Afioga i le Taitaifono ma sui auai o lenei Komiti. Aua o lenei galuega o le galuega na afua atu iinei i le Maota ma faapena ona faataatia atu tuutuuga o le galuega.

Ou te faapea atu la lau Afioga, o le faamoemoe lea na i ai i tuutuuga na tuuina atu, o lo o faapea mai:

1. Ia lauliliu le matafaioi a le Palemene e ao ona fai pe a tulai mai mataupu faapenei, le suiga ia o Tulafono;
2. E taua ona sailia ma tuliloa e lenei suesuega le amiotonu o le faagasologa na faatino ai le faaofi o Teuteuga ua maua e pei ona aliae mai ai le eseese o lomiga o Tulafono ua i ai nei;
3. Silasila i aafiaga faaetulafono na faatino ai lea galuega ma le;
4. Le tuuina mai o ni fautuuga mo se alafua e ao ona faataoto mo se fofo mo mataupu faapenei i le toe tulai mai i le lumanai.

Lau Afioga i le Fofoga Fetalai, o lea ua taoto le Lipoti, ua feofofoai foi ma faasoa le Maota e tusa ai ma finagalo ma taofi, ma e taua uma, aua o le tatou galuega o le tatou galuega e fai faatasi, ma o le matafaioi lea a le Palemene, o Tulafono. Le amataina o Tulafono, Teuteuga o Tulafono, le toe suia ma le toe tuu i tua ma le toe aumai i totonu, o mea uma na o le matafaioi a tatou.

Lau Afioga i le Fofoga Fetalai, e tasi le lauga na ou maua ua amata ona tautala i le taunuuga o suiga ia. Ae ao ona ou faaleo mo faamaumauga o le mataupu lenei, e lua taunuuga.

Muamua, o le leai o se fuafuaga faaetulafono i le filifilia o Faamasino, ae taua lea mo le faatinoga ma le faagasologa o galuega a le Faamasinoga. O le taunuuga muamua lena.

O le taunuuga lona lua lea na aumai e le Komiti e fai ma faataitaiga, e i ai le mataupu lea sa luga lalo ai foi a tatou talanoaga, o le pule faitalia, discretionary power. Ma o tatou o tagata faitulafono, o mea ia tatou te faaeteete i ai, o le pule faitalia. Aua o le Tulafono e tataua ona tilotilo i itu uma e puipuia ai, e fai o le faatinoga o le Tulafono e le Faamasinoga, ae puipuia ai foi i latou e agai atu i le Faamasinoga. O taunuuga na e lua ou te sii maia e faamaumauina i le talanoaga o le mataupu lenei.

O le isi itu ua ou maua lau Afioga i le Fofoga Fetalai, o le talanoaina o Ofisa po o tagata faigaluega a le Malo, ua i ai upu o le lape, faatamala, o le solitulafono, tulaga uma faapea. Ia ma e i ai foi se lagona faapea, ua sau se upu ua saunoa i ai nisi o le Maota, “ati ma le lau, soloia ma le aufuefue”. O upu na o le faa-Samoa ma le aganuu e fai ai le faasala.

Ae i ai foi aulape o le Tulafono ia, ia i latou e le faatinoina latou tiute. Po o le lape po o le faatamala, ae tilotilo pe o le a le taunuuga ma le aafiaga. Pe tatou te tuufau pea? O fesili na e tulai mai.

Lau Afioga i le Fofoga Fetalai, e faalogologo ma le totoa i saunoaga ma fetalai a sui usufono mamalu, ma e tele itu taua o lo o faapena ona saunoa mai ai. Ua ou matauina mo le Lipoti lava ia ua taatia i le Laulau-a-Fono ma Fautuaga e 4 ua tuuina mai, o le Fautuaga 1: le Fautuaga o lo o lagalaga ai finagalo, aemaise le le manino po o le a le uiga o le upu o le tuu ese, faasolomuli ia e pei ona aliae mai i le Fautuaga 1.

Ma ou te manatu lau Afioga i le Fofoga Fetalai ma le mamalu o le Palemene, i luga o ia saunoaga uma ma le Lipoti ua taatia, ou te fia faatuina se lafo mo le Maota, ina ia faagasolo ai le tatou mataupu ma le faamoemoe e tatou te maua se taunuuga ma se fofo o faafitauli o lo o feagai nei ma tatou.

Ma e ou te faapea atu lau Afioga, ma le faaaloalo ou te faatuina le lafo e faapea, *Ua faamauina le Lipoti a le Komiti Suesue Faapitoa a le Palemene i suiga ma lomiga eseese o le Teuteuga o le Faavae 2020 ma le Tulafono o Fanua ma Suafa 2020, ina ia talia Fautuaga 2, 3 ma le 4, a ia faataatiaese le Fautuaga 1, ae lafo i le Pule Faatonu ma le Loia Sili e tapena mai ni Teuteuga talafeagai o Tulafono ua suia, ma ala e fatino ai. Ma ia toe tuuina mai ma faataatia i le Laulau-a-Fono a le Palemene ia Teuteuga i se taimi lata mai.*

Ma le faaaloalo lau Afioga, o le lafo lea.

Faaluaina e le Sui Palemia ma le Minisita mo Faatoaga ma Faigafaiva.

Na faamaonia le lafo ma tulai ai le Fautuaga 2, 3 ma le 4 o le Lipoti a le Komiti Suesue Faapitoa ua faamaonia seiavagana ai le Fautuaga 1 o le a faataatiaese ae lafo i le Loia Sili ma le Pule Faatonu e tapena mai Teuteuga talafeagai o Tulafono ua suia ma toe tuuina mai ma faataatia i le Laulau-a-Fono a le Palemene i se taimi lata mai.

FOFOGA FETALAI: Ia, ao le i taumafai atu se upu mulimuli a le Fofoga Fetalai, ia e ao pea ona avatu pea se faasilasilaga...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai...

FOFOGA FETALAI: Ia se i tulai mai lau afioga i le Sui Taitai...

Tofa Hon Lauofo Fonotoe Nuafesili Pierre Lauofo: Ioe, ia maua se avanoa e na o sina minute se tasi, ua matau atu foi i le tatou taimi....

FOFOGA FETALAI: Saunoa mai lau afioga....

Tofa Hon LAUOFO FONOTOE NUAFESILI PIERRE LAUOFO: Ua pasi le tatou taimi malolo ae o lea foi sa faatu le lafo e faaauuina ai ae... E

tulai atu ma le faaaloalo e faamauina le faafetai. Faafetai foi i le Afioga i le Palemia ma lana saunoaga foi e tusa ai ma le tatou mataupu o lea ua faaiuina. E talitonu lava foi e pei ona faafofoga le Maota ma faafofoga foi le tapuaiga a le atunuu, ia e le o se mataupu faigofie. E tele foi lava nai faafitauli ia ae o lea la ua taoto mai ia le fofo.

Faafetai foi i le afioga i le Taitai Komiti ma le latou foi Komiti. E ui lava e le i saina isi sui e lua, ia e pei foi ona saunoa le afioga i le Taitaifono, ia ua alualu foi le folauga ua valaau le Atua i se tasi foi o sui o lana auvaa. Ia e ui i lea o mea lava e tutupu i le lalolagi nei.

Ae faafetai o lea ua matau atu i le lafo faatu ma ua pasia, ia o lea ua faataatiaese le Fautuaga 1, ia aveese le vaega lea o le faasolomuli ma isi vaega uma ia, le tulaga o solitulafono, ia a o lea o le a toe foi e toe silasila i ai le Kapeneta ma le faigamalo. Ia o se taimi o muamua, ona aumai lea o se fofo i luma o le tatou Maota nei e ala mai i se Tulafono Tau Faaofi ia pe o le a lava le auala, ia o le tulaga lena e pei ona ou tulai atu ai ma le faaaloalo.

Faafetai i lau Afioga, manuia le faaiuga o lenei vaiaso ma lenei fonotaga, ia alofagia e le Atua lou soifua, maua pea le tofa, ia maua lou malosi aua le faatonutonufolauina o le Fono a Samoa. Alofagia foi e le Atua le soifua o le Afioga i le Palemia, Sui Palemia ma le auvaa, ia, Minisita Lagolago, ia faapea foi lenei Itu o le malu, ia faapea foi le tapuaiga a Samoa.

Ia o le matou faapuupuu atu lea ma le faaaloalo.

FOFOGA FETALAI: Ia malo faafetai saunoa i lau afioga i le Sui Taitai o le Itu Agai. Ia ou te talitonu lava o lea ua taatia i paga, ua toamalie le mataupu e pei foi ona lagalaga ai finagalo, ia e ese lava auala a le Atua e tuuina mai. O le mea lea, ia tatou faafoi le Viiga i le Atua i mea lelei ma mea taua aua lava le toamalie ma le toafilemu o le Maota ia aemaise foi o le faafogafoga mai a le atunuu. Malo lava faafetai mo le saunoaga.

Ia e i ai si faaaliga lea a le Nofoa, talu ai ona o lea ua i ai nai suiga laitiiti o le tatou Komiti o Tupe Maua ma Tupe Totogi ona ua i ai foi fautuaga ua tuuina mai i le Nofoa ma le Komisi i se tasi foi o suiga. O le suiga lea o le Afioga ia Hon Sala Fata Pinati, o lea ua talosaga mai lena Itu ina ia suitulaga i ai le afioga ia Aliimalemanu Moti Momoemausu Alofa Tuuau i le Komiti o Tupe Maua ma Tupe Totogi. Ia ma o lea foi ua i ai le finagalo o le Komisi, ma ua talia foi le fesuaiga e pei ona tuuina mai ia aua lava le agai i luma o le tatou Komiti, ona e fai lava si tele o le galuega i le tatou Komiti o Tupe Maua ma Tupe Totogi aua le latou galuega e pei ona i ai le tatou Tala o le Tupe.

Ia o le tulaga lena e tusa o se tasi o faaaliga a le Fofoga Fetalai. Ia ma e le toe tele foi se gagana a le Nofoa, i lenei aso ma le alofaiva a lo tatou Maota, ia ua ese foi lagona o lenei aso. Ma e manatu foi ua o tatou taufai lagonaina le Agaga fesoasoani o le Atua.

E na o le faamalo lava ma le faafetai a le Fofoga Fetalai, faafetai mo saunoaga. Faafetai foi i le tofa fetalai i le afioga i le Tamaitai Palemia ma le Malo ua saga faatonufofoga ai pea le tatou Palemene i le filemu. Malo faafetai.

Faafetai i le tapuaiga a le atunuu, ua ae manuia ai faiva o lenei aso. Pe a o tatou tatala, ia alofagia e le Atua taualumaga o totoe o lenei aso.

Ae tatou te le i tolopo, e talosaga atu i lau Afioga i le Sui Fofoga Fetalai, e te saunia se tatou tatalo e faaiu ai le tatou fonotaga.

Na tolopo Taualumaga a le Fono Aoao Faitulafono i le itula e 12:33 i le aoauli seia aulia le Aso Lua, 21 o Iuni 2022 i le itula e 9:30 i le taeao.